

袁簡齋太史作靈胎先生傳云欲采其奇方異術以垂醫鑑而活蒼生因倉卒不可得僅載述耕石汪令聞數條而語焉未詳予甚惜之今夏呂君慎菴以泃溪醫案鈔本一卷寄贈云得之徐氏及門金君復村者予讀之如獲鴻寶雖秘本而方藥不甚詳然其穿穴膏肓神施鬼設之伎足以垂醫鑑而活蒼生爰爲編次竊附醫鑑用俟高明梓以傳世予殷望焉

咸豐五年歲次乙卯十月海昌後學王士維

中風

辨

外感停食

失魂

暑

痢

畏風

痰喘亡陰

呃

消

亢陽

腸紅

瘀血衝厥

試胎

產後腸癰

腸癰

項疽

對心發

惡風

傷寒

時證

崇病

暑邪熱嘔

癩痢

痰

飲癖

齏

蟲痛

吐血

血痢

胎中毒火

產後風熱

惡痘

腿癰

對口

肺癰

周痺

則足傷寒

遊魂

瘧疫

瘡

畏寒

痰喘

翻胃

水腫

怔忡

瘀留經絡

崩

子利

產後血瘕

流注

臂疽

發背

乳癰

下疳

筋瘤

涇溪醫案

吳江徐大椿著

海昌後學王士雄編

中風

封門金姓早立門首卒遇惡風口眼喎邪嚙不能言醫用人參桂附諸品此近日時醫治風證不祕之方也趨余視之其形如尸面赤氣粗目瞤脈大虛以祛風消痰清火之劑其家許以重貲留數日余曰我非行道之人可貨取也固請余曰與其誤藥以死莫若服此三劑醒而能食不服藥可也後月餘至余家拜謝問之果服三劑而起竟不敢服他藥惟腿膝未健手臂猶麻爲立膏方而全愈此正內經所謂虛邪賊風也以辛熱剛燥治之固非以補陰滋膩治之亦謬治以辛涼佐以甘溫內經有明訓也

運使王公敘揆自長蘆罷官歸里每向余言手足麻木而疲多余謂公體本豐腴又善飲啖痰流經脈宜擻節爲妙一日忽昏厥遺尿口嚙手拳痰聲如鋸皆屬危證醫者進參附熟地等藥煎成未服余診其脈洪大有力面赤氣粗此乃痰火充實諸竅皆閉服參附立斃矣以小續命湯去桂附加生軍一錢爲未假稱他藥納之恐旁人之疑駭也感冀莫不譁然太夫人素信余力主服余藥三劑而有聲五劑而能言然後以消痰養血之藥調之一月後步履如初

張由巷劉松岑素好飲後結酒友數人終年聚飲余戒之不止時年纔四十除夕向店沽酒秤銀手振秤墜而身亦仆地口嚙不知人急扶歸歲朝遣人邀余與以至寶丹數粒囑其勿服他藥恐醫者知其酒客又新納寵必用溫補也初五至其家竟未服藥診其脈弦滑洪大半身不遂口強流涎乃濕痰注經傳腑之證余用豁痰驅濕之品調之月餘而起一手一足不能如舊言語始終艱澀初無子病愈後連舉子女皆成立至十三歲而卒誰謂中風之人不能永年耶凡病在經絡筋骨此爲形體之病能延歲月不能除根若求全愈過用重劑必至傷生富貴之人聞此等說不但不信且觸其怒是諂諛之人羣進溫補無不死者終無一人悔悟也

西門外汪姓新正出門遇友於途一揖而仆口噤目閉四肢癱瘓昇歸不省人事醫亦用人參熟地等藥其母前年曾抱危疾余爲之治愈故信余求救余曰此所謂虛邪賊風也以小續命湯加減醫者駭謂壯年得此必大虛之證豈可用猛劑其母掘氣議而服隔日再往手攬余衣兩足踏地欲作叩頭勢余曰欲謝余乎亟點首余止之復作垂涕感恩狀余慰之且謂其母曰風搏深入舌本堅硬病雖愈言語不能驟出母驚恐而誤投溫補也果月餘而後能言百日乃痊

東山席以萬年六十餘患風痺時醫總投溫補幸不至如近日之重用參附病尚未劇余診之脈洪而氣旺此元氣強實之體而痰火充盛耳清火消痰以治標養血順氣以治本然經絡之痰無全愈之理於壽命無傷十年可延也以平淡之方隨時增損調養數載年七十餘始卒此所謂人實證實養正驅邪以調和之自可永年重藥傷正速之死耳

叔子靜素無疾一日余集親友小酌叔亦在座吃飯至第二碗僅半頭忽垂箸亦落同坐問曰醉耶不應又問骨哽耶亦不應細視之目閉而口流涎羣起扶之別座則頸已歪脈已絕痰聲起不知人矣極取至寶丹灌之始不受再灌而嚙下少頃開目問扶者曰此何地也因告之故曰我欲歸扶之坐輿內以歸處以曠風消痰安神之品明日已能起惟軟弱無力耳以後亦不復發此總名卒中亦有食厥亦有痰厥亦有氣厥病因不同如藥不預備則一時氣不能納經絡閉塞周時而死如更以參附等藥助火助痰則無一生者及其死也則以爲病本不治非溫補之誤舉世皆然也 雄按資生經云有人忽覺心腹中熱甚或曰此中風之候與治風藥而風不作夷陵某太守夏間忽患熱甚乃以水灑地設簟臥其上令人扇之次日忽患中風而卒人但咎其臥水篔而用扇也暨見一澧陽老婦見證與太守同因服小續命湯而愈合而觀之乃知中風由心腹中多大熱而作也徐氏之論正與此合易曰風自火出諺云熱極生風何世人之不悟耶若可用參附等藥者乃脫證治法不可誤施於閉證也

惡風

湖州副總戎穆公廷弼氣體極壯忽患牙緊不開不能飲食絕粒者五日矣延余治之晉接如常惟呼饑耳余啓視其齒上下止開一細縫撫其兩頰皮堅如革細審病情莫解其故因問曰此爲惡風所吹公會惡風否曰無之既而恍然曰誠哉二十年前曾隨圍口外臥帳房中夜半怪風大作帳房拔去卒死者三人我其一也灌以熱水二人生而一人死我初醒口不能言者二日豈至今復發乎余曰然乃戲曰凡治皮之工皮堅則消之我今欲用藥消公之頰皮也乃以蜈蚣頭蝎子尾及朴硝礬砂冰礬等藥擦其內又以大黃牙皂川烏桂心等藥塗其外如有痰涎則吐出明晨余臥未起公啓戶曰眞神仙也早已食粥歎惋矣遂進以驅風養血膏而愈蓋邪之中人深則伏於臟腑骨髓之中精氣旺則不發至血氣既衰或有所感觸雖數十年之久有復發者不論內外之證盡然亦所當知也 雄按皮膚頑痺非外治不爲功此因其堅如革故多用毒烈之品也

周痺

烏程王姓患周痺證偏身疼痛四肢癱瘓日夕叫號飲食大減自問必死欲就余一決家人垂淚送至舟中余視之曰此歷節也病在筋節非煎丸所能愈須用外治乃遵古法敷之榻之薰之旬日而疼痛稍減手足可動乃遣歸月餘而病愈大凡榮衛臟腑之病服藥可至病所經絡筋節俱屬有形煎丸之力如太輕則不能攻邪太重則恐傷其正必用氣厚力重之藥敷榻薰蒸之法深入病所提邪外出古人所以獨重針灸之法醫者不知先服風藥不驗即用溫補使邪氣久留即不死亦爲廢人在在皆然豈不寃哉 雄按風藥耗榮液溫補實隧絡皆能助邪益痛若輕淡清通之劑正宜類服不可徒恃外治也

痺

新郭沈又高續娶少艾未免不節忽患氣喘厥逆語澹神昏手足不舉醫者以中風法治之病益甚余診之曰此內經所謂痺證也少陰虛而精氣不續與大概偏中風中風痿厥風厥等病絕不相類劉河間所立地黃飲

子正爲此而設何醫者反忌之耶一劑而喘逆定神氣清聲音出四肢展動三劑而病除八九調以養精益氣之品而愈余所見類中而宜溫補者止此一人識之以見余並非禁用補藥但必對證乃可施治耳 雄按古云真中屬實類中多虛其實不然若其人素稟陽盛過啖肥甘積熱燼痰壅塞隧絡多患類中治宜化痰清熱流利機關自始至終忌投補滯徐氏謂宜於溫補者不多見洵閱歷之言也

傷寒

蘇州柴行倪姓傷寒失下昏不知人氣喘舌焦已辦後事矣余時欲往揚州泊舟桐涇橋河內適當其門晚欲登舟其子哀泣求治余曰此乃大承氣湯證也不必加減書方與之戒之曰一劑不下則更服下卽止遂至揚月餘而返其人已強健如故矣古方之神效如此凡古方與病及證俱對者不必加減若病同而證稍有異則隨證加減其理甚明而人不能用若不當下者反下之遂成結胸以致聞者遂以下爲戒顛倒若此總由不肯以冲最傷寒論潛心體認耳

則足傷寒

嘉善黃姓外感而兼鬱熱亂投藥石繼用補劑邪留經絡無從而出下注於足兩脛紅腫大痛氣逆衝心呼號不寐余曰此所謂則足傷寒也足將落矣急用外治之法薰之蒸之以提毒散瘀又用丸散內消其痰火并化其毒涎從大便出而以辛涼之煎劑託其未透之邪三日而安大凡風寒留於經絡無從發洩往往變爲癰腫上爲發頤中爲肺癰肝癰痞積下爲腸癰便毒外則散爲斑疹瘡瘍留於關節則爲痿痺拘攣注於足脛則爲則足矣此等證俱載於內經諸書自內外科各分一門此等證遂無人知之矣

外感停食

淮安大商楊秀倫年七十四外感停食醫者以年高素封非補不納遂致聞飯氣則嘔見人飲食輒叱曰此等臭物虧汝等如何吃下不食不寢者匝月惟以參湯續命而已幕名來聘余診之曰此病可治但我所立方必

不服不服則必死若徇君等意以立方亦死不如竟不立也羣問當用何藥余曰非生大黃不可衆果大駭有一人曰姑俟先生定方再商其意蓋謂千里而至不可不周全情面俟藥成而私棄之可也余覺其意煎成親至病人所強服旁人皆惶恐無措止服其半是夜即氣平得寢並不瀉明日全服一劑下宿垢少許身益和第三日侵晨余臥書室中未起聞外譚傳曰老太爺在堂中掃地余披衣起詢告者曰老太爺久臥思起欲親來謝先生出堂中因果穀盈積乃自用帚掠開以便步履旋入余臥所久談早膳至病者觀食自向碗內撮數粒嚼之且曰何以不臭從此飲食漸進精神加舊羣以爲奇余曰傷食惡食人所共知去宿食則食自進老少同法今之醫者以老人停食不可消止宜補中氣以待其自消此等亂道世反奉爲金鍼誤人不知其幾也余之得有聲淮揚者以此

時證

西塘倪福徵患時證神昏脈數不食不寢醫者謂其虛投以六味等藥此方乃浙中醫家不論何病必用之方也遂糶米不得下咽而煩熱益甚諸人束手余診之曰熱邪留於胃也凡外感之邪久必歸陽明邪重而有食則結成燥矢三承氣主之邪輕而無食則凝爲熱痰三瀉心湯主之乃以瀉心湯加減及消痰開胃之藥兩劑而安諸人以爲神奇不知此乃淺近之理傷寒論具在細讀自明也若更誤治則無生理矣 雄按韓堯半年甫論冠體素豐而善飲春間偶患血溢廣服六味等藥初夏患身熱痞脹醫投瀉心陷胸等藥遂脹及少腹且起按大便旁流小洩不行煩熱益甚湯飲不能下嚙譚語脣焦改用承氣紫雪亦如水投石延余視之黃苔滿厚而不甚燥脈滑數而按之虛軟不過濕熱阻氣升降不調耳以枳桔湯加白前紫苑射干馬兜鈴杏仁厚朴黃芩用蘆根湯煎一劑譚語止小洩行二劑旁流止胸漸舒三劑可進稀糜六劑胸腹皆舒粥食漸加改投清養法又旬日得解燥矢而愈諸人亦以爲神奇其實不過按證設法耳 又按今夏衣賈戴七患暑濕余以清解法治之熱退知饑家人謂其積勞多虛遽以補食啖之三日後二便皆閉四肢腫痛氣逆衝心呼號不寐又

乞余往視乃餘邪得食而熾壅塞胃府氣實則經氣亦不通而機關不利也以葶藶湯去葷以加薤仁枳實
梔子蘘子黃芩桔梗煎調元明粉外用葱白杵爛和蜜塗之小溲先通大便隨行三日而愈

游魂

郡中蔣氏子患時證身熱不涼神昏譫語脈無倫次余診之曰此游魂證也雖服藥必招其魂因訪招魂之法
有鄰翁謂曰我聞虔禱竈神則能自言父如其言病者果言曰我因看戲小臺倒幾被壓受驚復往城隍廟中
散步魂落廟中當以肩輿擡我歸如言往招明日延余再診病者又言我魂方至房門爲父親衝散今早魂臥
被上又爲母親疊被掉落今不知所向矣咆哮不已余慰之曰無憂也我今還汝因用安神鎮魂之藥加猪心
尖辰砂絳帛包裹懸藥罐中煎服戒曰服藥得寢勿驚醒之熱寐卽神台果一劑而安調理而愈問之俱不知
也

失魂

平湖張振西壁鄰失火受驚越數日而病發無大寒熱煩悶不食昏昏不寐余視之頗作寒暄語而神不接余
曰此失魂之證不但風寒深入而神志亦傷不能速愈亦不可用重劑以煎方祛邪以丸散安神乃可漸復時
正歲除酌與半月之藥而歸至新正元宵始知身在臥室問問前所爲俱不知也至二月身已健同其弟元若
來謝候余山中且曰我昨晚腦後起一瘰微痛余視之驚曰此玉枕疽也大險之證此地之藥急同之歸外提
內託諸法並用其弟不能久留先歸明晨我子大驚呼余曰張君危矣余起視之頭大如斗脣厚寸餘目止細
縫自頂及眉鬢泡數千惟神不昏憤毒未攻心尙可施救急遣舟招其弟余先以護心藥灌之毋令毒氣攻內
乃用煎劑從內託出外用軟堅消腫解毒提膿之藥敷之一日而出毒水斗餘至晚腫漸消皮嫩明日口舌轉
動能食竟不成痘瘡口僅如錢大數日結痂其弟聞信而至已愈八九矣凡病有留邪而無出路必發腫毒患
者甚多而醫者則鮮能治之也

揚州吳運臺夫人患消證晝夜食粥數十椀氣逆火炎通夕不寐余診之六脈細數不倫神不清爽余曰此似祟脈必有他故其家未信忽一日僕婦晨起入候見牀上一女盛妝危坐以爲夫人也諦視則無有因以告夫人曰此女常臥床內以此不能成寐而煩渴欲飲耳服余藥未甚效一夕夜將半病者大呼曰速請三舅爺來切不可啓門啓門則我魂必走出三舅爺者卽其弟唐君悔生也臥室遽隔呼之不能聞女僕私啓門邀之魂卽隨出徧歷廳堂廊廡及平昔足未經行者遇唐君趨至魂堅執其辮仍返房見已身臥床上唐君撫之魂遂歸附於身問所寓目皆不爽細攷所見之女乃運臺聘室也未成婚而卒卒之時囑其父母謂吳郎必顯貴我死須懇其血食我而葬我於祖墓運臺服官後未暇辦故爲祟運臺謂余曰君言有爲祟者攻果驗眞神也將何以慰之余曰鬼有所歸乃不爲厲公當迎柩厝墓立位而祀之可也運臺依余言以行然後服藥有功而病根永除矣

祟病

同里朱翁元亮僑居郡城歲初其媳往郡拜賀其舅舟過婁門見城上蛇王廟俗云燒香能免生瘡腫因往謁焉歸卽狂言昏冒舌動如蛇稱蛇王使二女僕一男僕來迎延余診視以至寶丹一丸遣老嫗灌之病者言此係毒藥必不可服含藥噴嫗嫗亦仆不省人事舌伸頸轉亦作蛇形另易一人灌藥訖病者言一女使被燒死矣凡鬼皆以硃砂爲火也次日煎藥內用鬼箭羽病者又言一男使又被射死矣鬼以鬼箭爲矢也從此漸安調以消痰安神之品月餘而愈此亦客忤之類也非金石及通靈之藥不能奏效

林家巷周宅看門人之妻縊死遇救得甦余適寓周氏隨衆往看急以紫金錠搗爛水灌之而醒明日又縊亦遇救余仍以前藥灌之因詢其求死之故則曰我患心疼甚有老嫗勸我將繩繫頸則痛除矣故從之非求死也余曰此嫗今安在則曰在床裏視之無有則曰相公來已去矣余曰此縊死鬼汝痛亦由彼作祟今後若來汝卽嚼余藥噴之婦依余言嫗至曰爾口中何物欲害我耶詈罵而去其自述如此蓋紫金錠之辟邪神效若

此

同學李鳴古性誠篤而能文八中書爲一時冠家貧不得志遂得奇疾日夜有人罵之聞聲而不見其形其罵語惡毒不堪遂惱恨終日不寢不食多方曉之不喻也其世叔何小山先生甚憐之同余往診李曰我無病惟有人罵我耳余曰此卽病也不信小山喻之曰子之學問人品人人歛服豈有詈汝之人耶李變色泣下曰他人勸我猶可世叔亦來勸我則不情甚矣昨日在閭壁罵我一曰卽世叔也何今日反來面諛耶小山云我昨在某處竟日安得來此且汝閭壁是誰家我何從入愈辨愈疑惟垂首浩歎而已卒以憂死

瘟疫

雍正十年崑山瘟疫大行因上年海嘯近海流民數萬皆死於崑埋之城下至夏暑蒸尸氣觸之成病死者數千人汪翁天成亦染此證身熱神昏悶亂煩躁脈數無定余以清涼芳烈如鮮菖蒲澤蘭葉薄荷青蒿蘆根茅根等藥兼用辟邪解毒丸散進之漸知人事因自述其昏暈時所歷之境雖言之鑿鑿終虛妄不足載也余始至崑時懼應酬不令人知會翁已愈余將歸矣不妨施濟語出而求治者二十七家檢其所服皆香燥升提之藥輿證相反余仍用前法療之歸後有葉生爲記姓氏愈者二十四死者止三人又皆爲他醫所誤者因知死者皆枉凡治病不可不知運氣之轉移去歲因水濕得病濕甚之極必兼燥化內經言之甚明况因證用藥變化隨機豈可執定往年所治祛風逐濕之方而以治瘟疫燥火之證耶

雄按風濕之邪一經化熱卽宜清解溫升之藥咸在禁例喻氏論疫主以解毒趕矣而獨表彰敗毒散一方不知此方雖名敗毒而羣升散之品凡溫邪燥火之證犯之卽死用者審之

暑

同學趙子雲居太湖之濱患暑病甚危留治三日而愈時值亢旱人忙而舟亦絕少余欲歸不能惟鄰家有一舟適有病人氣方絕欲往震澤買棺乞借一日不許有一老嫗指余曰此卽治趙某病愈之人也今此婦少年

繼生甚故氣不卽斷盍求一診余許之脈絕而心尚溫皮色未變此暑邪閉塞諸竅未卽死也爲處清暑通氣方病家以情不能却借舟以歸越數日子雲之子來詢之一劑而有聲二劑能轉側三劑起矣

余寓郡中林家巷時值盛暑優人某之母忽嘔吐厥僵其形如尸而齒嚙不開已辦後事矣居停之僕從優求效於余余因近鄰往診以箸啓其齒咬箸不能出余曰此暑邪閉塞諸竅耳以紫金錠二粒水磨灌之得下再服清暑通氣之方明日余泛舟游虎阜其室臨河一老嫗坐窗口榻上彷彿病者歸訪之是夜黃昏卽能言更服煎劑而全愈此等治法極淺極易而知者絕少蓋邪逆上諸竅皆閉非芳香通靈之藥不能卽令通達徒以煎劑灌之卽使中病亦不能入於經竅况又誤用相反之藥豈能起死回生乎

蘆墟耕石暑熱壞證脈微欲絕遺尿謔語尋衣摸牀此陽越之證將大汗出而脫急以參附加童便飲之少甦而未識人也余以事往郡戒其家曰如醒而能言則來載我越三日來請亟往果生矣醫者謂前藥已效仍用前方煎成未飲余至曰陽已回火復熾陰欲竭者附子入咽卽危命以西瓜啖之病者大喜連日啖數枚更飲以清暑養胃而愈後來謝述昏迷所見有一黑人立其前欲啖之卽寒冷入骨一小兒以扇扇之曰汝不怕霹靂耶黑人曰熬爾三霹靂奈我何小兒曰再加十個西瓜何經黑人惶恐而退余曰附子古名霹靂散果服三劑非西瓜則伏暑何由退其言皆有證據亦奇事也

雄按袁簡齋太史作靈胎先生傳載此案云先投一劑須臾目瞑能言再飲以湯竟躍然起故張柳吟先生以爲再飲之湯當是白虎湯今原案以西瓜啖之因西瓜有天生白虎湯之名而袁氏遂下一湯字致啓後人之疑序事不可不憶此類是矣

毛履和之子介堂暑病熱極大汗不止脈微肢冷面赤氣短醫者仍作熱證治余曰此卽刻亡陽矣急進參附以回其陽其祖有難色余曰辱在相好故不忍坐視亦豈有不自信而嘗試之理死則願甘償命乃勉飲之一劑而汗止身溫得寐更易以方不十日而起同時東山許心一之孫倫五病形無異余亦以參附進舉室皆疑駭其外舅席際飛篤信余力主用之亦一劑而復但此證乃熱病所變因熱甚汗出而陽亡苟非脈微足冷汗

出舌潤則仍是執證誤用卽死死甚多傷心慘目此等方非有實見不可試也

雄按舌潤二字最宜切記

閩門內香店某姓患暑熱之證服藥既誤而樓小向西樓下又香燥之氣薰鬱津液厥不知人舌焦目裂其家去店三里欲從烈日中搗歸以待斃余曰此證固危然服藥得法或尚有生機若更暴於烈日之中必死於道六先進以至寶丹隨以黃連香薷飲兼竹葉石膏湯加蘆根諸清涼滋潤之品徐徐灌之一夕而目赤退有聲神氣復而能轉側二日而身和能食稀粥乃歸家調養而痊 雄按此證已津液受燥舌焦目裂矣則用至寶丹不如用紫雪而香薷亦可議也

常熟席湖北患暑熱證已十餘日身如熾炭手不可近煩躁昏沈聚諸汗藥終無點汗余曰熱極津枯汗何從生處以滋潤清芳之品三劑頭先有汗漸及手臂繼及遍身而熱解蓋發汗有二法濕邪則用香燥之藥發汗卽以去濕燥病則用滋潤之藥滋水卽以作汗其理易知而醫者茫然可慨也

洞庭後山席姓者暑邪內結厥逆如尸惟身未冷脈尚微存所謂尸厥也余謂其父曰邪氣充塞逼魂於外通其諸竅魂自返耳先以紫金錠磨服後用西瓜蘆根蘿葡甘蔗打汁時時灌之一日兩夜納二大碗而漸甦問之則曰我坐新廟前大石上三日見某家老嫗某家童子忽聞香氣撲鼻漸知身在室中有一人臥床上我與之相并乃能開目視物矣新廟者前山往後山必由之路果有大石詢兩家老嫗童子俱實有其事此類甚多不能盡述其理固然非好言怪也

閩門龔孝維患熱病忽手足拘攣呻吟不斷醫亂昏迷延余診視脈微而燥膚冷汗出陽將脫矣愈慮以參附方親戚滿座謂大暑之時熱病方劇力屏不用其兄素信余遠衆服之身稍安明日更進一劑漸甦能言余乃慮以消暑養陰之方而愈

郡中友人蔣奕園氣體壯健暑月於親戚家祝壽吃湯餅過多回至閩門又觸臭穢滯暑夾食身熱悶亂延醫

治之告以故勉用輕藥一劑亦未能中病也况食未消而暑未退豈能一劑而愈明日復診曰服清理而不愈則必虛矣即用參附是夕煩躁發昏四肢厥冷復延名醫治之曰此虛極矣吏重用參附明日熱冒昏厥而斃余往唁之傷心慘目因念如此死者遍地皆然此風何時得息又傷親故多遭此禍歸而作慎疾芻言刻印萬册廣送諸人冀世人之或悟也雄按慎疾芻言今罕流傳海豐張柳吟先生加以按語改題曰醫芻欲以砥庸流之陋習也余已刊入叢書

暑邪熱呃

東山席士俊者暑月感冒邪留上焦神昏呃逆醫者以爲壞證不治進以參附等藥呃益甚余曰此熱呃也呃在上焦令食西瓜羣醫大譁病者聞余言卽欲食食之呃漸止進以清降之藥二劑而諸病漸愈又有戚沈君倫者年七十時邪內陷而呃逆是時余有揚州之行乃囑相好尤君在涇曰此熱呃也君以枇杷葉鮮蘆根等清降之品飲之必愈尤君依余治之亦痊蓋呃逆本有二因由於虛寒逆從臍下而起其根在腎爲難治由於熱者逆止在胸臆間其根在胃爲易治輕重懸絕世人謂之冷呃而概從寒治無不死者死之後則云凡呃逆者俱爲絕證不知無病之人先冷物後熱物冷熱相爭亦可呃逆不治自愈人所共見何不思也

瘧

洞庭姜錫常長郎佩芳體素弱而患久瘧時余應山前葉氏之招便道往晤佩芳出診色天脈微而動易出汗余駭曰汝今夕當大汗出而亡陽矣急進參附或可挽回其父子猶未全信姑以西洋參三錢偕附子飲之仍回葉宅夜二鼓叩門聲甚急啓門而錫常以肩輿來迎至則汗出如膏兩目直視氣有出無入猶賴服過參附湯未遽脫適余偶帶人參錢許同附子童便灌入天明而汗止陽回始知人事然猶聞聲卽疊倦臥不能起者兩月而後起坐上工治未病此之謂也如此危急之證不但誤治必死卽治之稍遲亦不及挽回養生者醫理不可不知也

痢

崇明施姓遷居郡之盤門其子患暑毒血痢晝夜百餘行痛苦欲絕嘉定張雨亭其姻戚也力懇余診之余曰此熱毒蘊結治之以黃連附膠等藥一服而去十之七八矣明日再往神清氣爽面有喜色余有事歸家約隔日重來歸後遇風潮連日行舟斷絕三日後乃得往診病者怒目視余問以安否厲聲而對曰用得好藥病益重矣余心疑之問其父曾服他人藥否隱而不言余甚疑之辭出有二醫者入門因託雨亭訪其故其父因余不至延郡中名醫仍進以人參乾薑等藥給病者曰視汝脈者此地名醫而藥則用徐先生方也及服而痛愈劇痢益增故恨予骨耳豈不冤哉又聞服藥之後口乾如出火欲啖西瓜醫者云痢疾吃西瓜必死欲求凉水尤禁不與因給其童取井水噉口奪盆中水飲其半號呼兩日而死近日治暑痢者皆用傷寒論中治陰寒入臟之寒痢法以理中湯加減無不腐爛慘死甚至有七竅流血者而醫家病家視爲一定治法死者接踵全不知悔最可哀也

東山葉寶倫患五色痢每日百餘次予悉治痢之法治之五六日疾如故私竊怪之爲撫其腹腹內有塊大小各一儼若葫蘆形余重揉之大者裂破有聲暴下五色濃垢斗許置烈日中光彩眩目以授痢頓減飲食漸進再揉其小者不可執持亦不能消痢亦不全止令其不必專力治之惟以開胃消積之品稍稍調之三四月而後塊消痢止大抵積滯之物久則成囊成癖凡病皆然古人原有此說但元氣已虛不可驟消惟養其胃氣使正足自能驅邪但各有法度不可并邪亦補之耳

瘧痢

東山姜錫常氣體素弱又患瘧痢每日一發寒如冰而熱如炭隨下血痢百餘次委頓無生理因平日相契不忍委之朝夕診視爲分途而治之寒禦其寒熱清其熱痢止其痢俱用清和切病之品以時消息而最重者在保其胃氣無使生機又絕經云食養盡之無使過之傷其正也諸證以次漸減而愈或謂如此大虛何以不用

峻補予曰寒熱未止必有外邪血痢未清必有內邪峻補則邪留不去如此虛人可使邪氣日增乎去邪母傷正使生機漸遠乃爲良策錫常亦深會此意而醫理漸明嗣後小病皆自治之所謂三折肱者也

畏寒

洞庭卜夫人患寒疾有名醫進以參附日以爲常十年以來服附子數十觔而寒愈劇初冬即四面環火緇衣幾重寒慄如故予曰此熱邪併於內逼陰於外內經云熱深厥亦深又云熱極生寒富散其熱使達於外用蘆根數兩煎清涼疏散之藥飲之三劑而去火十劑而減衣常服養陰之品而身溫逾年附毒積中者盡發周身如火燒服寒涼得少減既又遍體及頭面口鼻俱生熱瘡下體俱腐爛膿血淋漓予以外科治熱毒之法治之一年乃復以後年彌高而反惡熱與前相反如不知其理而更進以熱藥則熱併於內寒併於外陰陽離絕而死死之後人亦終以爲陽虛而死也

畏風

嘉善許閣學竹君夫人抱疾醫過用散劑以虛其表繼用補劑以固其邪風入榮中畏風如矢閉戶深藏者數月與天光不相接見微風則發寒熱而暈延予視予至臥室見窗榻皆重布遮蔽又張帷於牀前煖帳之外周以原缺診其脈微軟無陽予曰先爲藥誤而避風太過陽氣不接衛氣不閉非照以陽光不可且曬日中藥乃效閣學謂見日必有風奈何曰姑去其瓦令日光下射曬之何如如法行之三日而能啓窗戶十日可見風諸病漸愈明年閣學挈眷赴都舟停河下邀予定常服方是日大風臨水窗候脈予甚畏風而夫人不覺也蓋衛氣固則反樂於見風此自然而然不可勉強也 雄按論證論治可與戴人頡頏

痰

嘉興朱宗周以陽盛陰虧之體又兼痰凝氣逆醫者以溫補治之胸膈痞塞而陽道痿羸醫謂脾胃兩虧將恐無治就予於山中予視其體豐而氣旺陽升而不降諸痰皆閉笑謂之曰此爲肝腎雙實證先用清潤之品加

石膏以降其逆氣後以消痰開胃之藥滌其中宮更以滋腎瀦陰之味鎮其元氣陽事即通五月以後妾即懷
孕得一女又一年復得一子惟覺周身火太旺更以養陰清火膏丸爲常饌一或間斷則火旺隨發委頓如往
日之情形矣而世人乃以熱藥治陽痿豈不謬哉 雄按今秋藩庫吏孫位申積勞善怒陡然自汗凜寒脫衣
欬逆嘔吐苦水延予診之脈弦軟而滑形瘦面黎苔黃不渴洩赤便難以二陳去甘草加沙參竹茹枇杷葉
竹葉黃連薤仁爲劑渠云陽痿已匝月矣恐不可服此涼藥予曰此陽氣上升爲痰所阻而不能下降耳一
服逆平痛定嘔罷汗止卽能安穀原方加人參旬日陽事卽通諸恙若失

蘇州府治東首楊姓年三十餘以狎游私用父千金父庭責之體虛而兼鬱怒先似傷寒後漸神昏身重醫者
以爲純虛之證惟事峻補每日用人參三錢痰火愈結身強如尸舉家以爲萬無生理予入視時俱環而泣予
診畢又按其體徧身皆生痰核大小以千計予不覺大笑泣者盡駭予曰諸人之泣以其將死耶試往府中借
板重打四十亦不死也其父聞之頗不信曰如果能起現今吃人參費千金矣當更以千金爲壽予曰此可動
他人予無此例也各盡其道而已立清火安神極平淡之方佐以末藥一服三日而能言五日而能坐一月而
行動如常其時牡丹方開其戚友爲設飲花前以賀予適至戲之曰君服人參千金而幾死服予末藥而愈藥
本可不償乎其母舅在旁曰必當償先生明示幾何予曰瘡病之藥值千金去病之藥自宜倍之病者有驚惶
色予曰無恐不過八文錢買芻子爲末耳尙有服臙者羣取視之果芻子也相與大笑其周身結核皆補往痰
邪所凝成者半載方消邪之不可留如此幸而結在膚膜若入臟則死已久矣 雄按今夏劉午亭年六十三
歲久患痰喘自汗羣醫皆以爲虛補劑備施竟無效徐月巖囑其挽予視之汗如雨下扇不停揮睛凸顯高面
浮腫大胸前癆塞脈滑而長妻女哀求慮其暴脫予曰將塞死矣何脫之云與導痰湯加旋覆海石澤瀉白前
一飲而減七日後顙門始平匝月而愈繼有顧某年五十六歲肥白多痰因啖蓮子匝月漸覺不眠齒逆自汗
無眠以爲虛也屢補之後氣逆欲死速余視之苔黃洩赤脈滑不調以清肺滌痰治之而愈旋以茯苓飲善其

後

痰喘

松江王孝賢夫人素有血證時發時止發則微嗽又因感冒變成痰喘不能著枕日夜膺几而坐竟不能支持矣是時有常州名醫法丹書調治無效延余至余曰此小青龍證也法曰我固知之但弱體而素有血證麻桂等藥可用乎余曰急則治標若更喘數日則立死矣且治其新病愈後再治其本病可也法曰誠然然病家焉能知之治本病而死死而無怨如用麻桂而死則不咎病本無治而恨麻桂殺之矣我乃行道之人不能任其咎君不以醫名我不與聞君獨任之可也余曰然服之有害我自當之但求先生不阻之耳遂與服飲畢而氣平就枕終夕得安然後以消痰潤肺養陰開胃之方以次調之體乃復舊法翁頗有學識並非時俗之醫然能知而不能行者蓋欲涉世行道蓋一不中則謗聲隨之余則不欲以此求名故毅然用之也凡舉事一有利害關心即不能大行我志天下事盡然豈獨醫也哉 雄按風寒外束飲邪內伏動而爲喘嗽者不能舍小青龍爲治案中云感冒是感冒風寒設非風寒之邪麻桂不可擅用讀者宜有會心也

痰喘亡陰

蘇州沈母患寒熱痰喘逸其婿毛君延余診視先有一名醫在座執筆沈吟曰大汗不止陽將亡矣奈何非參附熟地乾薑不可書方而去余至不與通姓名俟其去乃入診脈洪大手足不冷喘汗淋漓余顧毛君曰急買浮麥半合大棗七枚煮湯飲之可也如法服而汗頓止乃爲立消痰降火之方二劑而安蓋亡陽亡陰相似而實不同一則脈微汗冷如膏手足厥逆而舌潤一則脈洪汗熱不粘手足溫和而舌乾但亡陰不止陽從汗出元氣散脫即爲亡陽然當亡陰之時陽氣方熾不可即用陽藥宜收斂其陽氣不可不知也亡陰之藥宜涼亡陽之藥宜熱一或相反無不立死標本先後之間辨在毫髮乃舉世更無知者故動輒相反也 雄按吳馥齋令姊體屬陰虧歸沈氏後余久不診上年聞其久嗽服大劑滋補而能食肌克以爲愈矣今夏延診云嗽猶不

愈及往視面浮色赤脈滑不調舌絳而乾非肉不飽曰此痰火爲患也不可以昔嘶脇痛遂疑爲損怯之末傳予清肺化痰藥爲丸噲化使其廓清上膈果膠痰漸吐各恙乃安其形復瘦始予養陰善後病者云前進補時體頗漸豐而腰間疼脹略一撫摩嗽即不已自疑爲痰而醫者謂爲極虛所致補益加峻致讓爲得體之痰也觀察毛公裕年屆八旬素有痰喘病因勞大發腑凡不能臥者七日舉家驚惶延余視之余曰此上實下虛之證用清肺消痰飲送下人參小塊一錢二劑而愈毛翁曰徐君學問之深固不必言但人參切塊之法此則聰明人以此術奇耳後歲餘病復作照前方加人參煎入而喘逆愈甚後延予視述用去年方而病有加予曰莫非以參和入藥中耶曰然余曰宜其增病也仍以參作塊服之亦二劑而愈蓋下虛固當補但痰火在上補必增盛惟作塊則參性未發而清肺之藥已得力過腹中而人參性始發病自獲痊此等法古人亦有用者人自不知耳於是羣相歎服 雄按痰喘礙眠亦有不禁虛者黃者華年踰五旬自去冬因勞患喘迨今春兩旬不能臥顧某作下喘治病益甚又旬日逐余視之脈弦滑首滿布舌邊絳乃冬溫薄肺失於清解耳予輕清肅化痰治之而痊至參不入煎飲其下達與丸藥噲化欲其上戀皆有妙義用藥者勿以一煎方爲了事也又有虛不在陰分者余治方囑山今秋患痰喘汗多醫進清降藥數劑遂便溏肢冷不食礙眠氣逆腕疼面紅汗冷予診之脈弦軟無神苔白不渴乃寒痰上實腎陽下虛也以真武湯去生薑加乾薑五味人參厚朴杏仁一劑知二劑已又治顧某體肥白脈沈弱痰喘易汗不渴痰多噉粥即嘔以六君去甘草加厚朴杏仁薑汁川連蓋中虛痰滯也投七果痊

飲癖

洞庭席載岳素脇下留飲發則大痛嘔吐先清水後黃水再後吐黑水而兼以血哀苦萬狀不能支矣愈則復發余按其腹有塊在左脇下所謂飲囊也非消此則病根不除法當外治因合蒸藥一料用麪作團放藥在內上蓋銅皮以艾火蒸之日十餘次蒸至三百六十火而止依法治三月而畢塊盡消其病永除年至七十七而

卒此病極多而醫者俱不知輕重不一而蒸法爲要 雄按今夏江陰沙浦生齏尹患胸下痞悶腹中寒塊臥則臍間有氣下行至指而惕然驚寤余謂氣鬱飲停治以通降適渠將赴都自慮體弱有醫者迎合其意投以大劑溫補初若相安旬日後神呆不語目眩不飢便閉不眠寒熱時作復延余診按其心下則濯濯有聲環臍左右塊已纍纍溺赤苔黃脈弦而急幸其家深信有年旁無掣肘凡通氣滌飲清絡舒肝之劑調理三月各恙皆瘳

、 翻胃

嘉興朱亭立曾任廣信太守向病嘔吐時發時愈是時吐不止粒米不下者三日醫以膈證回絕其友人來邀診余曰此翻胃證非膈證也膈乃胃腑乾枯翻胃乃痰火上逆輕重懸殊以半夏瀉心湯加減治之漸能進食尋復舊從此遂成知己每因飲食無節時時小發且不善飯如是數年非余方不服甚相安也後余便道過其家謂余曰我遇武林名醫謂我體虛非參附不可今服其方覺強旺加餐余謂此乃助火以腐食元氣必耗將有熱毒之害亭立笑而腹非之似有恨不早遇此醫之意不兩月遣人連夜來迎卽登舟抵暮入其寢室見牀前血膈滿地駭問故亭立已不能言惟垂淚引過作泣別之態而已蓋血湧斗餘撫藥可施矣天明而逝十年幸活殞於一朝天下之服熱劑而隱受其害者何可勝數也 雄按服溫補藥而強旺加餐病家必以爲對證矣而孰知隱受其害哉更有至死而猶不悟者目擊甚多可爲歎息

婁門范昭素患翻胃粒米不能入咽者月餘胸中如有物蠢動余曰此蟲膈也積血所成舉家未信余處以開膈末藥佐以硫黃三劑後吐出淤血半甌隨吐蟲二十餘枚長者徑尺短者二寸色微紫其腸俱空乃藥入而蟲積食之皆洞腸而死者舉家驚喜以爲病愈余曰未也姑以粥與之連進二碗全然不嘔更覺寬適頃之粥停不下不能再食余曰胃腑已爲蟲蝕無藏食之地無救也辭不復用藥不旬日而卒

呃

郡中陸某患呃逆不過偶爾胃中不和挾痰挾氣世俗所謂冷呃也不治自愈非若病後呃逆有虛實寒熱之殊關於生死也陸乃膏粱之人從未患此遂大懼延醫醫治醫者亦大駭云此必大虛之體所以無病見此卽用人參白朮等藥痰火凝結而胃絡塞呃遂不止病者自問必死舉家驚惶余診視之不覺狂笑其足伸在旁怪而問故余曰不意近日諸名醫胃味至此此非病也一劑卽愈矣以瀉心湯加旋覆花枇杷葉果一劑而呃止越一月呃又發仍用前日諸醫治之數日而死其老僕素相熟偶遇於他所問其主人安否因述其故余曰前幾死我以一劑救之何以蹈覆轍曰衆論紛紛謂補藥一定不錯直至臨死時欲來敦請已無及矣嗚呼豈非命耶 雄按吳雨峯大令年七十一歲今秋患感發熱而兼左脇偏痛舌色乾紫無苔稍呷湯飲小洩卽行不食不便脈洪且數余知其平素津虛脾約氣滯痰凝連予輕肅宜滯之劑熱漸緩脇漸舒而舌色不潤仍不喜飲洩赤便閉呃逆頻來舉家皇皇余曰無恐也便行卽止矣踰二日連得暢解脈靜身涼舌色有津呃仍不減人皆謂高年病後之虛呃議用鎮補余曰此氣爲痰阻升降失調得食不舒平時無噓是其徵也授以枳桔湯加萹薤菖蒲橘半柴胡果一劑知二劑已

齋

學宮後金汝玉忽患小便不通醫以通利導之水愈緊而溺管益塞腹脹欲裂水氣衝心卽死卽飲湯藥必不能下而反增其水余曰此因溺管閉極不能稍通也以發腫藥塗之使溺器大腫隨以消腫之藥解之一腫一消溺管稍寬再以藥湯洗少腹而擠之蓄溺湧出而全通矣此無法中之法也

本濱某小便閉七日腹脹如鼓僵僵不能立衝心在頃刻矣就余山中求治余以鮮車前根搗爛敷其腹用諸利水藥內服又煎利水通氣藥使坐湯中令人揉擠之未幾溺迸出灑及揉者之面溺出斗餘其所坐木桶幾滿腹寬身直徜徉而去 雄按兩外治法皆妙

水腫

痲癩席君際飛形體壯實喜飲善啖患水腫病先從足起遂及遍身腹滿瀝利水之藥稍快旋即復腫用鍼針之水從鍼孔出則稍寬鍼眼閉則復腫內經有刺水病之法其穴有五十七又須調養百日且服閉藥而此法失傳所以十難療一余所治皆愈而復發遂至不救雖因病者不能守法亦由醫治法不全耳惟皮水風水則一時之驟病風利水無不立愈痲固各不同也

消

常熟汪東山夫人患消證夜尤甚每夜必以米二升煮薄粥二十碗而溲便不異常人此乃爲火所燻也先延郡中葉天士治以烏梅木瓜等藥斂其胃氣消證少瘳而煩悶羸瘦飲食無味余謂此熱痰凝結未有出路耳以清火消痰兼和中開胃調之病情屢易隨證易方半年而愈

蟲痛

蘇州黃四房女年十二患腹痛愈醫愈甚余偶至其家昏厥一夕方甦舌俱咬破流血盈口唇白而目猶直視脈參錯無常余曰此蟲痛也貫心則死非煎藥所能愈合化蟲丸與之痛稍緩忽復更痛吐出蟲二十餘條長者徑尺紫色餘長短不齊淡紅色亦有白者自此而大痛不復作小痛未除蓋其巢未去也復以殺蟲之藥兼安胃補脾之方調之而蟲根遂絕蓋此證甚多醫者既不能知惟認爲寒與食卽以爲蟲又無殺蟲之方在精力強旺者久能自化其不足者變爲丁奚勞怯痞厥等證至死而人不能知亦可哀也余治此證不一姑舉其最劇者以明治法

常州蔣公諱斌之孫患心腹痛上及於頭時作時止醫藥罔效向余求治余曰此蟲病也以殺蟲之藥蟲卽遠避或在周身皮膚之中或在頭中按之如有蠕動往來之象余用殺蟲之藥爲末調如糊到處敷上而以熱物熨之蟲又逃之他處隨逃隨敷漸次平安而根終不除遂授方令歸越二年書來云蟲根終未盡但不甚爲害耳此真奇疾也

怔忡

淮安巨商程某母患怔忡日服參朮峻補病益甚聞聲卽暈持厚聘請余余以老母有恙堅辭不往不得已來醫診視見二女僕從背後抱持二女僕徧體敲摩呼太太無恐吾儕俱在也猶驚惕不已余之消痰之藥去其涎以安神之藥養其血以重墜補精之藥納其氣稍得寢半月餘驚恐全失開船放炮亦不爲動船擠喧嘩歡然不厭蓋心爲火藏腎爲水藏腎氣挾痰以衝心水能尅火則心振蕩不能自主使各安其位則不但相尅而且相濟自然之理也

長興趙某以經營過勞其心患怔忡證醫者議論不一遠來就余余以消痰補心之品治其上滋腎納氣之藥治其下數日而安此與程母病同而去稍異一則氣體多痰誤服補劑水溢而火受尅之證一則心血虛耗相火不甯侵犯天君之證不得混淆也

姻戚殷之晉年近八旬素有腸紅證病大發飲食不進小腹高起陰囊腫亮昏不知人余因新年賀歲候之正辦後事余診其脈洪大有力先以竈灰石灰作布袋置陰囊於上袋濕而囊腫消飲以知母黃柏瀉腎之品越三日予飲於周氏周與至戚相近半里忽有叩門聲啓視之則其子扶病者至在座無不驚喜同問予曰何以用伐腎之藥而愈予曰此所謂欲女子而不得也衆以爲戲言翁曰君眞神人也我嚮者館穀京師患亦相似主人以爲無生理也遂送我歸歸旬日卽痊今妻妾盡亡獨處十餘年貧不能蓄又恥爲苟且之事故病至此既不可以告人亦無人能知之者言畢悽然淚下又閱五年而卒蓋人之稟各殊亢陽之害與縱慾同非通於六經之理於岐黃之奧者不足與言也 雄按縱慾固傷陰而亢陽亦燥陰知柏瀉腎者瀉腎火之有餘而保其不足之水也

平望鎮張瑞五素有血證歲辛丑予營蘇先君託其買磚灰等物鄉城往返因勞悴而大病發握手泣別謂難吐血

再會矣予是時始合瓊玉膏未試也贈以數兩而去自此不通音問者三四載一日鎮有延予者出其前所服方問何人所寫則曰張瑞五曰今何在曰即在館橋之右卽往候之精神強健與昔迥異因述服瓊玉膏後血不復吐嗽亦漸止因涉獵方書試之頗有效以此助館穀所不足耳予遂導以行醫之要惟存心救人心心敬慎擇清淡切病之品俾其病勢稍減卽無大功亦不貽害若欺世徇人止知求利亂投重劑一或有誤無從挽回病家縱不知我心何忍瑞五深以爲然後其道大行遂成一鎮名家年至七十餘面卒瓊玉膏爲治血證第一效方然合法頗難其時不用人參祇用參鬚生地則以浙中所出鮮生地打自然汁熬之不用乾地黃治血證舍此無有無弊者 雖按行醫要訣盡此數語所謂以約失之者鮮學者勿以爲淺論也

洞庭吳倫宗夫人席翁士俊女也向患血證每發予以清和之藥調之相安者數年郡中名醫有與席翁相好者因他姓延請至山適遇病發邀之診視見予前方謂翁曰此陽虛失血此公自命通博乃陰陽不辨耶立溫補方加鹿茸二錢連服六劑血上冒連吐十餘碗一身之血盡脫脈微目閉面青唇白奄奄待斃急延予治予曰今藏府經絡俱空非可以輕劑治亟以鮮生地十觔絞汁煎濃略加人參末徐徐進之歷一晝夜盡生地汁稍知人事手畏得展動層與面紅白稍分更進阿膠三七諸養陰之品調攝月餘血氣漸復夫血脫補陽乃指大脫之後陰盡而陽無所附肢冷汗出則先用參附以回其陽而後補其陰或現種種虛寒之證亦當氣血兼補豈有素體陰虛之人又遇氣升火旺之時偶爾見紅反用大熱升發之劑以擾其陽而斃其陰乎此乃道聽塗說之人聞有此法而不能深思其理誤人不淺也

嘉興王蔚南久患血證左脇中有氣逆衝喉旁血來有聲如沸戊子冬忽大吐數升面色白而帶青脈微聲喘氣喘不得臥危在旦夕予以阿膠三七等藥保其陰而止其血然後以降火納氣之品止其衝逆復以補血消痰健脾安胃之方上下分治始會能臥繼令能食數日之後方能安臥大凡脫血之後斷不可重用參升氣助火亦不可多用滋膩以助痰滯胃要知補血之道不過令其陰陽相和飲食漸進則元氣自復非補劑入腹

卽變爲氣血也若以重劑寒其胃口則永無生路矣况更用溫熱重劑助陽燥陰而速之死乎

洞庭張姓素有血證是年爲女辦裝過費心力其女方登輜張忽血冒升餘昏不知人醫者濃煎參湯服之命懸一息邀予診視六脈似有如無血已脫盡急加阿膠三七少和人參以進脈乃漸復目開能言手足展動然後純用補血之劑以填之月餘而起蓋人生不外氣血兩端血脫則氣亦脫用人參以接其氣氣稍接卽當用血藥否則孤陽獨旺而陰愈虧先後主客之分不可不辨也

療留經絡

烏鎮莫秀東患病痛始於背達於胸脇寔則飲食如常暮乃痛發呼號徹夜鄰里憐聞醫治五年家資蕩盡秀東欲自縊其母曰汝有子女之累尙須冀念不如我死免聞哀號之聲欲赴水其戚憐之引來就醫余曰此瘀血留經絡也因謂余子熾曰此怪病也廣求治法以療之非但濟人正可造就己之學問因留於家用針灸與場煎丸之法無所不備其痛漸輕亦漸短一月而愈其人感謝不置余曰我方欲謝子耳凡病深者須盡我之技而後奏功今人必欲一劑見效三劑不驗則易他醫子獨始終相信我之知己也能無感乎

腸紅

淮安程春谷素有腸紅證一日更衣忽下血斗餘暈倒不知人急灌以人參一兩附子五錢而甦遂日服人參五錢附子三錢而雜以他藥參附偶間斷則手足如冰語言無力醫者亦守而不變僅能支持急棹來招至則自述其全賴參附以得生之故診其六脈極洪大而時伏面赤有油光舌紅而不潤目不交睫者旬餘矣余曰病可立愈但我方君不可視也春谷曰我以命託君止求效耳方何必視余用茅草根四兩作湯兼清涼平淡之藥數品與參附正相反諸戚友俱駭春谷弟風衣明理見道之士也謂其譖郎曰爾父千里招徐君信之至徐君慨然力保無虞任之至安得有誤耶服一劑是夕稍得寢二劑手足溫三劑起坐不眩然後示之以方春谷駭歎諸人請申其說余曰血脫扶陽乃一時急救之法脫血乃亡陰也陽氣既復卽當補陰而更益其陽則

陰血愈虧更有陽亢之病其四肢冷者內經所謂熱深厥亦深也不得臥者內經所謂陽勝則不得入於陰陰虛故目不瞑也白茅根交春透發能引陽氣達於四肢又能養血清火用之使平日所服參附之力皆達於外自能手足溫而臥矣於是始相折股凡治血脫證俱同此 雄按論治既明而茅根功用尤爲發人所未發

血痢

洞庭葛允誠患血痢五年日夜百餘次約去血數石骨瘦如柴飲食不進舉家以爲必無生理余友姜君錫常次子萼芳從余學習於山中病者卽萼芳妻弟也錫常憐之令同萼芳寄膳余家朝夕診視予先用滋補之劑以養其血脈復用開胃之藥以滋其化源稍健而能食久痢至五載大腸之內必生漏管遂以填補之品塞其空竅痢日減飯日增不半年而每食飯必六七碗至冬病全愈豐肥強壯歸至家親戚俱不相識認無不歎以爲奇

崩

徽州鹽商汪姓始富終貧其夫人年四十六以憂勞患崩證服參附諸藥而病益劇延余治之處以養血清火之劑而病稍衰蓋此病本難除根也越三年夫卒欲往武林依其親戚過吳江來方且泣曰我遇先生而得生今遠去病發必死耳余爲立長服方且贈以應用丸散而去閱十數年郡中有洋客請治其室人一白頭老嫗出拜余驚問曰我卽汪某妻也服先生所贈方藥至五十二而崩證絕今已六十餘強健逾昔我婿迎我於此病者卽我女也不但求治我女必欲面謝故相屈耳蓋崩證往往在五十歲以前天癸將絕之時而衝任有火不能攝納橫決爲害至五十以後天癸自絕有不藥而愈者亦有氣旺血熱過時而仍有此證者當因時消息總不外填陰補血之法不知者以溫熱峻補氣愈旺而陰愈耗禍不旋踵矣此極易治之病而往往不治蓋未能探攷其理而誤殺之耳

瘀血衝厥

粟山水利同知借余水利書余往索出署突有一人攔輿喊救命謂我非告狀欲求神丹奪命耳其家即對公署因往視病者死已三日方欲入棺而層目忽動按其心口尚溫誤傳余能起死回生故泥首哀求余辭之不獲乃給之曰余舟中有神丹可救因隨之舟中與黑神丸二粒教以水化灌之非能必其效也隨即歸家後復至山中其人已生蓋此乃瘀血衝心厥而不返黑神丸以陳墨爲主而以消瘀鎮心之藥佐之爲產後安神定魄去瘀生新之要品醫者苟不預備一時何以奏效乎

胎中毒火

南門陳昂發夫人懷娠三月胎氣上逆舌腫如蛋色紫黑粒米不能下醫者束手延余治余曰此胎中有毒火衝心舌爲心苗故毒聚於舌腫塞滿口則飲食絕矣乃用珠黃散及解毒軟堅之藥屢塗其舌腫漸消而納食復用清涼通氣之方消息治之或謂解毒清火與胎有害余曰不然胎氣旺甚愈涼愈安但熱毒傷陰當滋養其血氣耳乃專服余藥孳生二子後詢其得病之故乃曾聽邪人之言服不經之藥幾致傷生可爲戒也

子利

爛溪潘開子表弟其夫人懷娠患痢晝夜百餘次延余視余以黃芩湯而減兼養胎藥飲之利遂減飲食得進而每日尚數十次服藥無效余曰此不必治名曰子利非產後則不愈但既產恐有變證耳病家不信更延他醫易一方則利必增劇始守余言止服安胎藥少許後生產果甚易而母氣大衰虛象百出適余從浙中來便道過其門復以產後法消息治之病痊而痢亦止蓋病有不必治而自愈強求其愈必反致害此類甚多不可不知也 雄按此所謂利卽是泄瀉古人名曰利下非今之痢也痢疾古名滯下若治前久痢不愈產後其能免乎

試胎

余往候族兄龍友坐談之際有老嫗惶遽來曰無救矣予駭問故龍友曰我姪婦產一日不下穩婆已回絕矣

問何在曰卽在前巷余曰試往診之龍友大喜卽同往漿水已涸疲極不能出聲穩婆猶令用力迸下余曰無恐此試胎也尙未產勿強之扶令安臥一月後始產產必順且生男穩婆聞之微晒作不然之態且曰此何人說此大話我收生數十年從未見有如此而可生者其家亦半信半疑余乃處以養血安胎之方一飲而胎氣安和全無產意越一月果生一男而產極易衆以爲神龍友請申其說曰凡胎旺而母有風寒勞碌等感動則胎墜下如欲生之象安之卽愈不知而以爲眞產強之用方則胎漿破而胎不能安矣余診其胎脈甚旺而月分未足故知不產今已搖動其胎將來產時必易脫故知易產左脈甚旺故知男胎此極淺近之理人目不知耳

產後風熱

西濠陸炳若夫人產後感風熱瘀血未盡醫者執產後屬虛寒之說用乾薑熟地治之且云必無生理汗出而身熱於炭層燥舌紫仍用前藥余是日偶步田間看菜花近炳若之居趨迎求診余曰生產血枯火熾又兼風熱復加以剛燥滋膩之品益火塞竅以此死者我見甚多非石膏則陽明之盛火不解遵仲景法用竹皮石膏等藥余歸而他醫至笑且非之謂自古無產後用石膏之理蓋生平未見仲景方也其母素信余立主服之一劑而甦明日炳若復求診余曰更服一劑病已去矣無庸易方如言而愈醫者羣以爲怪不知此乃古人定法惟服薑桂則必死

產後血暈

蘇州顧某繼室產後惡露不出遂成血暈醫者束手顧君之兄掌夫余戚也延余治之余曰此瘀血凝結非桃仁等所能下古法有抵當湯今一時不反備以唐人法用肉桂黃連人參大黃五靈脂成劑下其瘀血羣醫無不大笑謂寒熱補瀉并相犯之藥合而成方此怪人也其家因平日相信與服明日掌夫告余曰病不可治矣病者見鬼竊飲所服藥乃大呼曰我不能食鬼之所吐也先生可無治矣余往驗之藥本氣味最烈之品嘗之

與水無二怪之仍以前方煎成親往飲之病者不肯飲以威迫之懼而飲是夕下瘀血升餘而腹漸平思食余以事暫歸隔日復往其門首掛榜燒楮余疑有他故入門見者皆有喜色詢之則曰先生去之夕病者夢其前夫人怒曰汝據余之室奪余之財虐余之女余欲傷汝命今爲某所治余將爲大蛇以殺汝卽變爲大蛇大驚而醒故特延僧修懺耳蓋前夫人以產後血暈亡病狀如一而醫者治不中病遂致不起蓋一病有一病治法學不可不博也

產後腸癰

洞庭某婦產後小腹痛甚惡露不止奄奄垂斃予診之曰惡露如此多何以其痛反劇更詢其所行之物又如膿象予曰此乃子宮受傷腐爛成癰也宜令名手穩婆探之果然遂用縣作條裹入生肌收口之藥而內服解毒消瘰之方應手而愈凡產後停瘵每多外證如此甚多不可不知也

惡痘

吳超士家僮已弱冠隨超士往戲館觀劇因寒熱作而先歸夜半呻吟不絕至明旦往視則置於牀下口稱羣鬼欲殺之拽出視之細點如麩予曰此惡痘也色暗紫急以升麻羌活生地等藥煎湯灌之三日而痘形出徧體無毫孔頭面結聚重疊始終用滋養氣血之品不用時下惡藥一味二十餘日始結痂焦黑成片大如手掌形如缸片剝去之後非復本來面目見者俱不相識可知痘證之必死者絕少皆醫以寒涼剋伐之藥誤之也毛履和之女患痘醫者曰此悶痘也五日而斃舉家扼腕適予至曰先生亦治痘否予曰醫者不肯治之痘則治曰已回絕矣因入視徧體大熱神昏不語細點如魚子隱在肉中予急以升麻羌活湯爲主而佐以養血透肌藥飲之三日而痘形顯前醫羣駭告之以故則又大笑曰升麻羌活等藥豈入痘科不知升麻湯乃痘證初起之主方而醫者不知也繼以養血解毒補氣之品其結痂也額如覆釜身如樹皮髮連痂脫三年始生時醫見此等證必用大黃石膏及惡毒之物虛其裏而增其毒五日而死之言必驗病家亦以爲醫者斷期如神就

知非其識之高乃其藥之靈也嗚呼慘哉

予同學沈冠雲之女痘密黑陷而無漿醫者束手冠雲告以故予曰姑處以補託之法用地黃歸身黃耆人參等藥聞者咸笑一服而漿來至明日以參貴停服予曰精力不充毒發未盡未盡必生痘毒後果臂灣生二毒復爲治之而安

予長孫女種痘點密而色深赤種痘之醫束手予用清發之藥并時含紫雪赤色稍衰將就寢復往視忽變灰白色而咬牙予驚曰證變虛寒矣此所謂亢害承制也卽用人參鹿茸等藥託之至三鼓而瘡色復紅形漸高趨仍用清火養血之方而漿成蓋病變無常頃刻轉易故凡屬危險之證醫者當時時消息不可片刻離也但不明理之醫則偏僻固執又方法絕少不能肆應不窮耳

流注

蘇州一小兒甫九齡頗聰慧而患流注肩背腰脇十餘處百端求治無效予視之曰此惟大活絡丹能愈服至三十餘丸未破者消已破者收口更服補氣血之藥而愈蓋流注一證由風寒入膜所致膜在皮中旁通四達初無定處所以隨處作患此眞脈絡之病故古人製大活絡丹以治之其餘煎丸皆非正治所謂一病有一病之法藥不對證總難取效也

本邑劉近曾夫人患虛痰流注色眊脈虛發無定處病極危險非旦夕可奏功予辭不能治郡中一醫以百金包好因留在家治之聞余有不能治之說笑曰我醫好後更請徐君質之當無言可對月餘劉君之兄元谷招予診近曾出曰流注之疾雖向愈而未收口託在相好肯一觀否余因視之肩後瘡孔大如錢內膜乾空與皮不連氣促脈微診畢而出近曾求方余笑不答書危在頃刻四字劉不信少頃內呼劉父子入已氣絕矣羣執包好之醫欲加以無禮余曉之曰此病本不治非藥誤也但不知生死爲無目耳乃釋之蓋流注之證其類不同大段皆津液枯而痰流膜內之證當內外交治而祛邪補虛亦另有切病方藥蠻補無益也

嘉善張卓舟未弱冠患流注五年自脇及腰腿連生七八孔寒熱不食僅存人形歷年共服人參二三千金萬無生理父母先亡只有慈母其伯悉收其田產文契專待其斃而取之其從兄汪千造余家哀懇余頗憐之破格往視半身幾成枯骨此乃虛痰流注醫者不能治其經絡之痰徒費重賞而無一中病者則藥之誤而非病之真無治也余用大活絡丹爲主而外敷拔管生肌之藥醫者聞之大笑曰活絡丹辛暴之藥豈可入口蓋彼惟知俗本所載烏頭蚯蚓之活絡丹而不知古方五十餘味之大活絡丹也蓋流注之痰全在於絡故非活絡丹不效以後膿稀肉長管退筋舒漸能起立不二年而肌肉豐肥強健反逾於常嗚呼不知對病施藥徒事蠻補舉世盡然枉死者不知其幾也 雄按大活絡丹治虛痰流注深爲合法而外科不知也若實癰則控涎丹

最妙

腸癰

侵與朱季舫少子嘯虎官性極聰敏年九歲腹痛腳縮拘攣而臥背脊突出一節晝夜哀號偏延內外科診視或云損證或云宿食或云發毒當刺突出之骨以出膿血其西席茅豈宿力薦余治往登其堂名醫滿座豈宿借余診視予曰此縮脚腸癰也幸未成膿四日可消聞者大笑時季舫爲灤州牧其夫人孔氏名族之女獨信予言余先飲以養血通氣之方并護心丸痛遂大減諸醫謂偶中耳明日進消癰逐毒丸散謂曰服此又當微痛無恐其夜痛果稍加諸醫聞之譁然曰果應我輩之言也明早又進和榮順氣之劑痛止八九而脚伸舫平果四日而能步諸醫以次辭去中有俞姓者儒士也虛心問故余謂雜藥亂投氣血傷矣先和其氣血自得稍安繼則攻其所聚之邪安能無痛既乃滋養而通利之則藏府俱安矣

南濠徐氏女經停數月寒熱減食肌肉消燦小腹之右下達環跳隱痛微腫醫者或作怯弱或作血痺俱云不治余診其脈洪數而滑寒熱無次謂其父曰此瘀血爲癰已成膿矣必自破破後必有變證宜急治與以外科託毒方并丸散即返山中越二日天未明叩門甚急啓視則徐之戚也云膿已大潰而人將脫矣即登其舟往

視臙出升餘脈微膚冷腸隨陰脫余不及處方急以參附二味煎湯灌之氣漸續而身漸溫然後以補血養氣之品兼託臙長肉之藥內外兼治兩月而漏口方滿精神漸復月事以時大凡瘡血久留必致成癰壅後留瘀及室女停經外證極多而醫者俱不能知至臙成之後方覓外科施治而外科又不得其法以致枉死者比比然也

臙癰

橫徑錢某之女素有痞塊從腹入少腹又從少腹入環跳之下大腿外臙變成大癰臙水淋漓成管管中有飯粒流出真不可解日漸狼狽諸醫束手其父泣而告余曰寒儉之家服人參已費百金而毫無效驗惟有立而視其死耳余曰人參不可長繼祇臙填漏外科自有正方也乃爲合治漏之藥內服外敷所服未藥亦有從瘡口流出者繼乃漸少胃氣亦開肌肉內生數月之後痂結筋舒前此從未生育期年懷孕生子凡治病各有對證方藥非可以泛治之方圖饒倖也

腎疽

長興周某之子腎生疽經年臙水不乾變爲多骨所食米粒間有從疽中出者奄奄待斃余爲內託外敷所服未藥亦從瘡口出繼而臙漸減少所出碎骨皆臙結成出盡之後肌肉日長口收痂結而愈

項疽

郡中朱姓患項疽大痛徹心時時出血延醫施治漫腫滋甚神思昏迷束手待斃延余視急用圍藥裏住根盤敷以止血散飲以護心丸痛緩血止神安得寢明日前醫來告以故醫謂同一金黃散我用無效被用神驗此命運不同非藥異也彼蓋不知圍藥每病各殊耳瘡口已定乃大託其臙兼以消痰開胃之品飲食漸進坐臥皆安兩月而愈凡治癰疽之法在視其人之肥瘠瘦弱之軀尤忌見血瘡口若大則肌肉難生所以最重圍藥其方甚多不可不廣求而預備也

同學沈自求妻子憂愁鬱結疽發於頤調治無效頤三倍瘡口環頸長尺餘闊三寸惟近咽喉處二寸未連而枕骨直下之筋未斷血流不止予辭不治堅懇不已先進護心丸二粒令毒不內攻又付止血散止其血外用圍藥厚塗束其根更以珠黃等藥時時敷瘡口上其膏藥長一尺三寸再以黃耆四兩煎湯煎藥服之勢定而飲食稍進數日血止膿成肌與腐肉方有界限瘡口太大皮肉不能合以生肌等藥并參耒厚塗而封之月餘口乃合病家欲備人參勸許以待用予曰無庸也諸痛癢瘡皆屬於火膿流肉腐皆傷於陰凡屬外證總以清火養陰爲主而加開胃健脾之藥人參止用錢許數劑即止此從古一定之法其用溫補乃後世訛傳之術無不陰受其害予凡治大證無不神效時人多不之信也

蘇州章倚文夫人體質本弱平時飲食絕少忽患項毒平漫不腫痛輒應心醫者謂大虛之症投以峻補毒伏神昏奄奄一息延予視之予曰毒無補理瘡口不高則以圍藥束之飲以清涼養血之品託毒於外兼服護心丸痛定而瘡根漸收予暫歸轉託一醫代治醫者強作解事曰圍藥不過金黃散之類無益也去之用藥亦意爲改易以炫己能瘡遂散大血出之止痛復甚而神疲予再至大駭詢之乃知其故醫者乃不復生議論於是仍用前法膿成食進而後得安蓋外科病不治者絕少皆由醫之不得其道所以動手輒誤病變日增而藥無一驗即束手無策矣

對口

白龍橋吳時臣年七十餘矣患對口痛欲絕余視其外無圍藥瘡內反有搗藥五條乃三品一條槍此古方蝕頭肉之惡藥而近日醫者誤以爲必用之品所以痛極昏迷余悉拔去搽以珠黃解毒散其痛立除而神安復用圍藥裏住其根使瘡頭高而膿易出或謂七旬之人精力已衰宜用溫補余曰外證俱屬火苟非現證虛寒從無用熱藥之理進清涼開胃之劑胃氣開則肌肉自生調養月餘而愈精神較勝前矣

平湖徐掄齋陰毒對口頸項漫腫而色紫有頭如痘者百餘神煩志亂醫者束手就治於余予曰此乃陰毒氣

似有崇其家爲述患病之後鬼聲繞屋鬼火不斷余曰且敷藥試之色稍鮮腫亦稍消明晨視之色轉淡紅其如痘者俱出微膿而低裏中聚一頭亦不甚大勢已消其十之三神亦漸清而思飲食病雖屬陰亦不可用熱藥以增邪火惟和血通氣使榮衛充盈使血中一點真陽透出則陰邪自退若用熱補則反助毒火而生機益絕故治外科之陰證非若傷寒之陰證爲外感之寒邪可專用桂附以驅之也今之號外科者惟捨內科之緒論以爲熱可禦寒而貽害不小矣

發背

洞庭吳姓從徐州經紀返棹背起粟粒深紫色而痛懸心周圍肌肉皆不仁知非輕證未至家而就余治余辭不能再三懇求姑用圍藥束之稍定病者謂我尙未到家當歸處分家事求借一廬如果不治死無餘憾歸二日而復來其瘡不甚大頂微高而堅黑當用刀挑破方可上藥以洋刀點之洋刀堅利非凡竟不能入用力挑之刀頭折乃用金鍼四面刺之以洩毒氣內託外敷其方屢變然後膿從四旁出頭蓋自落約深半寸脊背隱露其尖亦腐去急以生肌散填補之內服峻補之劑兩月而肉滿皮完此九死一生之證不早爲外東內託則焦骨攻藏無生理矣

周莊陸姓疽發背周徑尺餘一背盡腫頭以百計毒氣內攻沈悶昏迷醫者以平塌無頭用桂附託之余曰此瘡止宜收小若欲加高則根盤如此之大而更加高則背駘耄耄矣此乃毒用熱藥必死乃以東根提毒之藥敷之一夕而瘡頭俱平皮膚亦潤止有大頭如杯高起於大椎骨之下三寸許尙不思飲食惟求食西瓜醫嚇以入口卽死余令縱其所食一日之內連吃大西瓜兩個明日知飢欲求肉飯食肉四兩飯半碗明日更加始終用託毒清火之劑而膿成口欽余囑曰此疽初起盈背背中脂膜皆空非填補裏膜必有他變有庸醫獻媚曰病已全愈爲此說者圖厚謝也我力能保之病家利其省費從之至來年二月忽舊疤中一細眼流血不止放血斗餘兩日而卒蓋其前一背盡腫其中之脂膜俱化成膿從大口出盡庸醫安知治法貪利誤人富貴之

家往往最信此等人可不省察耶

對心發

郡中唐廷發偶過余寓時方暑謂背上昨晚起一小瘰搔之甚癢先生肯一看否余視之駭曰此對心發也唐不甚信曰姑與我藥余曰君未信予言一服藥而毒大發反疑我誤君矣含笑而去明日已大如酒杯而痛甚乃求醫治余曰此非朝夕換方不可我不能久留郡寓奈何因就醫予家旦暮易法其中變遷不一卒至收口其收口前十日忽頭痛身熱神昏譫語瘡口黑陷六脈參差予適出門兩日歸而大駭疑爲瘡證變重幾無可藥細詢其僕乃貪涼當風而臥瘡口對風膏藥又落風貫瘡中卽所謂破傷風也乃從外感治法隨用風藥得汗而解身涼神清瘡口復起仍前治法而痊若不審其故又不明破傷風治法則必無效惟有相視莫解而已

肺癰

蘇州錢君復庵歎血不止諸醫以血證治之病益劇余往診見其吐血滿地細審之中似有膿而腥臭者余曰此肺癰也膿已成矣金匱云膿成則死然有生者余遂多方治之君亦始終相信一月而愈蓋予平日因此證甚多集唐人以來治肺癰之法用甘涼之藥以清其火滋潤之藥以養其血滑降之藥以祛其痰芳香之藥以通其氣更以珠黃之藥解其毒金石之藥填其空兼數法而行之屢試必效今治錢君亦兼此數法而痊強健逾舊幾二十年至乾隆三十年家業日隆因遷居大造途中相值邀余視其新居坐談良久辭出見其右額有豆大黑點問之錢對曰昨此處生一瘰頗癢無他苦也予諦審之曰此毒發於內治之失宜可以傷命非輕疾也錢笑而腹非之予曰本當爲君竭力但君未信若一用藥而毒大發則反以爲病由藥作故不敢但多年相好不可不盡言如五六日病勢增重當來相聞勿爲人誤越五日遣人邀予山中往則見其額腫目閉哀號竟夕方悔信予之不早細視皮中有物乃三品一條槍也拔去五條嗟乎此乃腐爛死肌之惡藥好肉用上其痛應心况額上皮內卽骨橫插皮中所以痛極予既不能久留又懷證難治力辭歸山易以他醫面目俱腐而卒

嗟乎前何相信之深後何不信之至豈非命乎

乳癰

東瀛庭劉某夫人患乳癰醫者既不能消散成功之後又用刀向乳頭上寸餘出毒瘡口向上膿反下注乳竇皆腐寒熱不食將成乳勞內外二科聚議無定羣以爲不治矣延余診之曰此非惡證治不如法耳尚可愈也但須百日耳其家戚族皆少年喜事聞余言欲塞羣醫之口向病家曰我輩公懇先生留山中百日必求收功而後已如欲歸家備快舟以迎送余初不允繼勉承之多方治之至九十日而未見功蓋病者柔弱畏痛既不敢於乳下別出一頭而膿水從上注下頗難出盡故有傳囊之患忽生一法用藥袋一個放乳頭之下用帛束縛之使膿不能下注外以熱茶壺熨之使藥氣乘熱入內又服生肌託膿之丸散於是膿從上泛厚而且多七日而膿盡生肌果百日而全愈後以此法治他證無不神效可知醫之爲術全賴心思轉變刻舟求劍終無一驗也

下疳

濮院沈維德患下疳前陰連根爛盡溺從骨縫中出瀝灌腎囊中哀號痛楚肛門亦復爛深半寸載至余家止求得生爲幸余亦從未見此病姑勉爲治之內服不過解毒養血之劑而敷藥則每用必痛屢易其方至不痛而後已兩月後結痂能行惟陰莖僅留根耳余偶閱秘本有再長靈根一方內用胎狗一個適余家狗生三子取其一泥裏煨燥合藥付之逾二年忽生一子舉族大譁謂人道已無焉能生子蓋維德頗有家資應繼者懷覬覦之心也其岳徐君密詢之沈曰我服藥後陽道已長生子何疑徐君乃集其族人共驗之陽道果全但累生如有節而無總皮再期又生一子衆始寂然遠近傳之以爲奇事今猶有述之以爲異聞者

附再長靈根方五十日復生效

煨乳石三錢五分 琥珀七分 硃砂六分 人參一錢 眞珠七分 牛黃四分 眞水粉五分 胎狗一個 雄黃六分 用靈仙首烏大

力子蓼草汁煮一晷夜炒如銀色右爲末每服三釐日進四服臥又一服俱以土茯苓半觔陰陽水十二碗煎五碗連送五服七日驗 雄案煮一晷夜而炒如銀色之藥品卽上文煨乳石等九味也詳玩文義似宜移右字於用字之上方順第胎狗煨燥必黑全狗分兩又必數倍於諸藥同煮同炒不知何以能如銀色是必煨時不令黑也

筋癰

蘇州一小童背上腫大如覆碗俯不能仰羣謂駝疾也或戲余曰君能治奇疾能愈此則我輩服矣其父母以余爲果能治也亦力求焉余實不知其中何物姑以腐藥塗上數日皮開肉爛視其肉如蚯蚓者盤結數條細審之乃背上之筋所聚也余頗悔輕舉急以舒筋收口丸散外敷內服筋漸散削漸平膚完而身直矣此筋癰之一種也閱傳以余爲能治駝疾從此求治駝者雲集余俱謝不能此乃幸而偶中古人並無此治法發未入都尙有人詢及者余謝無此事而已存此以識異 雄按洞溪神於外科讀其所評外科正宗等書已見一斑是編列案僅十餘條然各大證治法略備洵癰疽家赤文綠字之書也可不奉爲圭臬哉

阿附刻許辛本農部札

惠書久不報闕然於懷承示醫書二種奉繳弟於此事茫然洞溪案僅校出誤字數處卽轉寄吳葆山舍親葆山醫學與王君孟英在伯仲之間亦極贊此書手眼通靈卽過錄一本奉爲鴻寶又校正數字屬轉達左右早付手民以廣其傳功德不細也內有脫簡弟意得原本補之大妙無則於章末旁註一闕字從郭公夏五之例何如覆蔣中堂書與醫案無異似宜附刻與秦司寇書則皆寒暄語可刪耳瘍科選粹批點確是徐氏手筆足與所批正宗相輔而行已過錄珍藏矣

又

來書謂中多時俗口頭語弟意名醫手筆既未可輒改又此等書取其活人而已不當以詩文例繩之正如藥

物牛渡馬勃止期有用非若佳花美卉有一殘缺便須摘去也原本不分卷亦可仍之葉多則當分葉不滿百可無分也

此書原本傳寫多誤光增與鑿警石泰官廣文許辛木註蓋部兩先生商權再四始行付梓茲摘錄農部程如右闕簡已從原本補此外不敢增損一字以見光增於此慎之又慎云海晶增光附錄

洞溪醫案卷餘

一、...

Faint vertical text columns, likely bleed-through from the reverse side of the page.

序

嘗讀小倉山房文集有徐靈胎先生傳知先生名大椿字靈胎吳江人隱於涇溪晚號涇溪老人凡星經水利音律武藝靡不通貫尤精醫術及讀先生所註難經醫學源流論恨未能盡讀先生著作今夏五月福建學政彭詠莪母舅知季習醫三載矣因由閩中寄慎疾芻言一卷囑付重刊原本多魯魚之悞遂加校讐而梓之按是書係先生六十餘歲所作閱歷既深言皆老當觀引首數言更見先生之心有大不得已於言者故不自覺其言之太過而惟恐不痛切不暢悉不能令人惕目驚心以致民命不長異端不熄斯道不傳在先生不得不盡言以開其悟而凡病者醫者皆不可不慎也

道光戊申仲夏長洲謝嘉孚蓉初氏序

余弱冠時家多痲病先世所藏醫書頗多因隨時翻閱不過欲稍識方藥而已循習漸久乃上追靈素根源下沿漢唐支派如是者十餘年乃註難經又十餘年而註本草又十餘年而作醫學源流論又五年而著傷寒類方五十年中批閱之書約千餘卷泛覽之書約萬餘卷每過幾時必悔從前疎漏蓋學以年進也乃世之醫者全廢古書隨心自造以致人多枉死目擊心傷數年前曾作芻言一冊欲以醒世而鮮克聽從竊思生長

聖朝毫無益於此世而半生攻苦雖有著述幾種皆統談醫學無驚心動魄之語足令人豁然開悟因復振心挖骨即芻言原本更加痛快剖悉實因悲憫填胸不能自己願覽者諒其苦心虛懷體察以之治人則敬慎可以寡過以之治己則明哲可以保身冀遇信從之有人庶綿斯道於一綫

乾隆丁亥秋七月巧日涇溪徐靈胎識

慎疾芻言

吳江徐靈胎洄溪著

補劑

學問之道必由淺入深從未有淺近不知而專求怪僻者况醫法一誤必至傷生害命尤不可不慎也夫所謂淺近者如傷風則防風荆芥感寒則蘇葉葱豉咳嗽則蘇子杏仁傷食則山楂神麴傷暑則香薷廣藿瘧疾則柴胡湯劑減痢疾則黃芩湯加減婦人則四物湯加減小兒則異功散加減此皆歷聖相傳之定法千古不能易也至於危險疑難之證則非此等藥所能愈必博考羣方深明經絡實指此病何名古人以何方主治而隨證加減今則以古聖之法爲卑鄙不足道又不能指出病名惟以陽虛陰虛肝氣腎弱等套語概之專用溫補以致外邪入裏馴至不救間有稍馴謹之人起病時仍用切近之藥一二劑未卽有效卽轉而改用溫補不思病之中人愈必有漸不可因無速效而卽換方也况所服之方或未盡苦不思卽於前方損益萬安而遽求變法又不肯先用輕淡之劑探測病情專取性雄力厚之品大反前轍必至害不旋踵總由胸無定見之故當思人之有病不外風寒暑濕燥火爲外內喜怒憂思悲驚恐爲內因此十三因試問何因是當補者大凡人非老死卽病死其無病而虛死者千不得一况病去則虛者亦生病留則實者亦死若果元氣欲脫雖浸其身於參附之中亦何所用乃謬學內經曰邪之所湊其氣必虛氣虛固當補矣所湊之邪不當去耶蓋邪氣補住則水不復出重則卽死輕則遷延變病或有幸而愈者乃病輕而元氣漸復非藥之功也余少時見問疾者聞醫家已用補藥則相慶病者已愈今則病勢方張正羣然議進參附熟地豈不可駭其始也醫者先以虛脫嚇人而後以補藥媚人浙江則六味八味湯加入參冬等藥江南則理中湯加附桂熟地鹿茸等藥於是人人習聞以爲我等不怕病死只怕虛死所以服補而死猶恨補之不早補之不重并自恨服人參無力以致不救醫者虛脫之言真有先見之明毫無疑悔若服他藥而死則親戚朋友羣詬病家之重財不重命死者亦目不能瞑

醫者之罪竟不勝誅矣所以病人向醫者述病必自謂極虛而旁人代爲述病亦共指爲極虛惟恐醫者稍用攻劑之劑以致不起或有稍識病之醫卽欲對證擬方迫於此等危言亦戰戰兢兢擇至補之藥以順其意既可取容更可免謗勢使然也此風之起不過三十餘年今則更甚不知何時而可挽回也

用藥

醫道起於神農之著本草以一藥治一病但一病有數證統名爲病如瘧病之類分明爲證如瘧而嘔吐頭疼而寒熱腹痛之類後之聖人取藥之對證

者合幾味而成方故治病必先有藥而後有方方成之後再審其配合之法與古何方相似則云以某方加減並非醫者先有一六味八味理中等湯橫於胸中而硬派人服之也至其辨證用藥之法如有人風寒痰食合者而成病必審其風居幾分痰食居幾分而藥則隨其邪之多寡以爲增減或一方不能兼治則先治其最急者所以無一味虛設之藥無一分不斟酌之分兩也况醫之爲道全在自考如服我之藥而病情不減或反增重則必深自痛懲廣求必效之法而後已則學問自能日進若不論何病總以幾味溫補投之愈則以爲己功死則以爲病本不治毫無轉計此則誤盡天下而終身不自知也又其所名陳方者用柴胡一味卽名柴胡湯用大黃一味卽名承氣湯於古人制方之義全然不知隨其口之所指而已其醫也則襲幾句陰陽虛實五行生尅籠統套語以爲用溫補之地而文人學士又最易欺見有陰陽五行等說卽以爲有本之學深信不疑其人亦自詡爲得醫學之捷徑將千古聖人窮思極想所製對證之方數千首皆不必問而已稱名醫矣夫醫者欲行其道相習成風猶無足怪獨是閒居涉獵之人亦俱蹈襲此等謬說與醫者同聲合氣知親友有病卽往幫助醫者用危言挈住本家使之不得不用溫補貴重之藥以明關切因而致死死則以爲用此等藥原未嘗云病者服之必效不過如此門第之家於理不該服價賤之藥耳若已生疾又有人亦以此法斃之眞屬可憫數十年前亦有涉獵醫學者頗能辨別藥性博覽經方今乃相率而入於魔道其始起於趙養葵張景岳輩全不知古聖製方之義私心自用書害成家彼亦不知流弊至於此極也我知天心仁愛其轉移必不久矣

中風

中風北人多屬寒宜散寒南人多屬火宜清火而祛風消痰則南北盡同古方自仲景侯氏黑散風引湯而外則續命湯爲主方續命湯共有數首不外驅風其隨證加減皆有精義從未有純用溫熱滋補不放風寒痰火一毫外出以致重病必死輕病則使之不死不生惟日服人參以破其家而戀其命最可傷也又有稍變其說者用地黃引子以爲得陰陽兼補之法亦大謬也此方乃治少陰氣厥不至舌瘖足痿名曰痲證乃純虛無邪有似中風與風寒痰火之中風正相反劉河間之書可考也乃以此方治有邪之中風其害相等余每年見中風之證不下數十人遵古治法十愈八九服溫補之藥者百無一愈未甚服補藥者尙可挽回其不能全愈或真不治者不過十之一二耳奈何一患此證遂甘心永爲廢人旁人亦視爲必不起之證醫者亦惟令多服重價之藥使之直得一死而可無遺憾豈不怪哉願天下之中風者斷勿以可愈之身自投於必死之地也

欬嗽

欬嗽由於風寒入肺肺爲嬌藏一味誤投卽能受害若用熟地麥冬黃肉五味等滋膩酸斂之品補住外邪必至咯血失音喉癰肚癰喘急寒熱近者半年遠者三年無有不死蓋其服此等藥之日卽其絕命之日也間有見幾而停藥者或能多延歲月我見以千計故今之吐血而成癆者大半皆因欬嗽而誤服補藥所致也或云五味子乃仲景治嗽必用之藥不知古方之用五味必合乾薑一散一收以治寒嗽之證非治風火之嗽也况加以熟地麥冬則受禍尤烈又嗽藥中多用桔梗桔梗升提甘桔湯中用之以載甘草上行治少陰之喉痛與治嗽宜清降之法非宜服者往往令人氣逆痰升不得著枕凡用藥當深知其性而屢試屢驗方可對病施治無得冒昧也

吐血

五十年前吐血者絕少今則年多一年其證本皆可愈而多不治者藥誤之也蓋血證因傷風欬嗽而起者十

之七八因虛勞原缺而起者十之一二乃醫者概以熟地人參麥冬五味等滋補峻斂之藥將風火痰瘀俱收拾肺管令其欬嗽不止元氣震動津液化痰不死何待凡風寒補住必成癆病無人不知今竟無一人知之矣蓋吐血而嗽者當清肺降氣略進補陰之品其不嗽者乃喉中之絡礙故血從絡出并不必服藥其甚者祇取補絡之藥以填損處自可除根即不服藥亦能自愈歷試不爽乃病者進以不服藥之說則雖或面從背後必非笑隨之進以熟地麥冬人參五味等藥則甘心就死前者死矣後者復然豈非命乎

中暑

暑字之名義與寒字相反乃天行熱毒之病也其證脈微少氣煩渴燥熱甚則手足反冷若汗出不止用人參白虎湯主之如或身熱腹痛脹滿嘔吐瀉痢脈冷則名熱霍亂人參斷不可用當用香薷飲藿香正氣散主之皆治暑之正法也若傷寒論中又有寒霍亂一證此乃寒邪入陰用理中湯主之此治寒霍亂之法也與暑熱之霍亂絕不相干乃後之醫書於熱霍亂門中附入寒霍亂一方名大順散用肉桂乾薑即理中湯之變法其方下亦註明治夏月傷冷飲之證其說甚明乃昏昧之人耳聞有此方竟以之治暑熱之霍亂以示奇異其死也宛轉呼號脣焦目裂七竅見血熱歸於內則手足反冷而脈微欲絕所謂熱深厥亦深也手足冷謂之厥厥者逆也乃病者醫者不知此理以為服熱藥而更冷其為陰證無疑故目覩其慘死而無所悔以後復治他人熱藥更加重矣與治暑熱痢者之用四逆湯其害正同舉世盡以為必當如此雖言不信也

痢疾

痢有數種誤治則生死立判凡脾氣不實飲食不化晝夜無度無紅白積者此為脾瀉其方不一當隨證施治若傷寒傳入陰經下利清穀脈微厥冷此為純陰之危證非參附乾薑不治患此者絕少若夫夏秋之月暑邪入腑膿血無度此名滯下全屬暑熱之毒蒸腸爛胃與陰寒之痢判若水火仲景以黃芩湯為主而因證加減千古不易之法今乃以暑毒熱痢俱用附桂薑茸始則日赤舌焦號痛欲絕其色或變如豆汁或如敗肝熱深

厥深手足逆冷不知其爲熱厥反信爲眞寒益加糞附以至胃爛腸裂哀號宛轉如受炮烙之刑而死我見甚多惟有對之流涕更有用六味湯及參耆等補藥者於久痢虛乏之人或有倖中若邪氣未清非成痼疾卽至不救蓋治痢之方甚多博考古書自能窮其變化何得以不入痢證之藥每投必誤也

陰證

六淫之邪不但暑燥火屬熱卽風寒濕亦變爲熱經云熱病者皆傷寒之類也又云人之傷於寒也則爲病熱故外感總以散熱爲治惟直中陰經之傷寒必現脈緊便青畏寒倦臥不喜飲舌無胎種種寒象當用溫散此千不得已者也何近日之醫舉天下寒熱雜感病勢稍重者皆指爲陰證卽用參附薑桂服後而熱更甚並不疑爲熱藥之故卽用熟地麥冬等以爲補陰配陽之法竟忘其爲外感矣要知陰證無發熱之理間有寒極似陽而外現熱證者其內證必現種種寒象然亦當驅散其寒如麻黃附子細辛湯之類亦並無補寒之法也以溫熱之邪硬派作陰證而全用溫補眞千古之奇聞也又有以夢洩房勞之後而得外感者爲陰證更屬笑談夫邪果入陰經卽無房勞等事亦屬陰證如邪不入陰經則自有本症治法與陰何干若云外邪乘虛入腎則尤當急驅腎中之邪豈可留邪燻腎又有用熱藥之後其熱勢益增忽轉而改用大寒乃是以藥試病矣要知一病有一病之方豈無對病和平之藥乃始投之火卽轉而投之水何也然其死也病家不咎熱藥之誤而咎寒藥之誤何也蓋人之死也必漸冷服熱藥而反冷則信以爲非藥之故若服寒藥而冷則明明以藥死之冷矣故熱藥之聚人不覺而寒藥之殺人顯然所以醫者盍可用補用熱雖死而猶可免咎也

老人

能長年者必有獨盛之處陽獨盛者當補其陰陰獨盛者當益其陽然陰盛者十之一二陽盛者十之八九而陽之太盛者不獨當補陰并宜清火以保其陰故老人無不頭熱耳盛面赤便燥現種種陽症乃醫者爲老人立方不論有病無病總以補陽爲上熱盛生風必生類中等病是召疾也若偶有風寒痰濕等因尤當急逐其

邪蓋老年氣血不甚流利豈堪補住其邪以與氣血爲難故治老人之有外感者總與壯年一例或實見其有虛弱之處則用輕淡之品而量爲補託若無病而調養則當審其陰陽之偏勝而損益使平蓋千年之木往往自焚陰盡火炎萬物盡然也故治老人者斷勿用辛熱之藥竭其陰氣助其亢陽使之面紅目赤氣塞痰壅脈洪膚燥當考艾之年而加以焚如之慘也

婦人

婦人懷孕胞中一點眞陽日吸母血以養故陽日旺而陰日衰凡半產滑胎皆火盛陰衰不能全其形體故也近人有胎前宜涼之說頗爲近理至於產後則陰血盡脫孤陽獨立臟腑如焚經脈如沸故仲景專以養血消瘀爲主而石膏竹茹亦不禁用余每遵之無不立效及近人造爲產後宜溫之邪說以薑桂爲主藥夫果陰陽俱脫脈遲畏寒血水淋漓面青舌白薑桂亦有用時乃血乾火燥純現熱症亦用熱藥則經枯脈絕頃刻而斃我見以百計更有惡露未淨身熱氣塞煩躁不寐心煩腹痛皆由敗血爲患亦用薑桂助其火而堅其瘀重則卽死輕則變成褥勞世之所謂女科名家一例如此蓋胎產乃天地生育之機絕少死謹其死皆藥誤也造爲此等邪說者九死不足以蔽其事

小兒

小兒之疾熱與痰二端而已蓋純陽之體日抱懷中衣服加煖又襁褓之類皆用火烘內外俱熱熱則生風風火相煽乳食不歇則必生痰痰得火煉則堅如膠漆而乳仍不斷則新舊之痰日積必至脹悶啼哭又強之食乳以止其啼從此胸高氣塞目證手搐卽指爲驚風其實非驚乃飽脹欲死耳此時告其父母令減衣停乳則必大慍謂虛羸若此反令其凍餒無不唾罵醫者亦不明此理非用剛燥之藥卽用參耆滋補至痰結氣凝之後則無可救療余見極多教之適其寒溫停其乳食以清米飲養其胃氣稍用消痰順氣之藥調之能聽從者十愈八九其有不明此理反目爲狂言者百無一生至於痘科尤屬怪誕痘爲小兒之所必不免非惡疾也當

天氣溫和之時死者絕少若大寒大暑其元氣虛而稠密者間有不治其始欲透發其後欲聚滿皆賴精血爲之乃未發以前卽用大黃石膏數兩以遏其生發之機而敗其云氣既而卽用蚯蚓數十躡蟾數個及一切大寒大毒之品如蜈蚣蝎子雞頭猪尾之類又將地丁銀花等粗糲之品數兩煎汁而灌之增其毒而倒其胃此等惡物卽令醫者自服之亦必胃絕脹裂而死况孩提乎凡用此等藥者必豫決此兒死於何日十不失一其父母翻盛稱其眼力不爽孰知其卽死於彼所用之藥也或有元氣充實幸而不死者遂以爲非此等大藥不能挽回而人人傳布奉爲神方矣更可異者強壯之年醫者黃芩麥芽俱不敢用以爲尅伐孩提之子則石膏大黃成兩成斤毫不顧慮忍心害理至此而極無奈呼天搶地以告人而人不信也又有造爲螳螂子之說者割開頤肉取出血瘀此法起於明末海濱妖婦騙財之法惟蘇松二處盛行割死者甚衆蓋小兒有痰火者吃乳數日必有一二日頤腫厭食名曰妬乳用薄荷朴硝爲末搽一二次卽愈卽不治亦愈至所割出之痰塊或大或小人因信之不知頤內空虛之處人人有此割則復生并非病也不然何以普天下之小兒從未有患螳螂子而死者獨蘇松有此病耶此亦一害故并及之

外科

治外科始起欲其不大將成欲其不痛大則傷肌爛膚腐骨穿筋難於收口痛則衝心犯胃耗血亡津惡證叢生矣故始起之時最重圍藥束其根盤截其餘毒則頂自高而膿易成繼則護心託毒治其內化腐提膿治其外自然轉危爲安乃始則不能束毒使小又無護心定痛之方惟外用五灰三品內服附桂熱毒等藥必至腐腸爛肉更輕用刀鍼割肉斷筋以致呼號昏亂神散魂飛宛轉求死仁人之所不忍見也况癰疽用刀太早最難生肌收口凡毒藥刀鍼只宜施於頑肉老皮餘者自有提頭呼膿之法至於惡肉自有消腐化水之方故能使患者絕無痛苦收功速而精神易復乃此等良法一切不問豈傳授之不真抑或別有他念也更可駭者癰瘍之證最重忌口一切鮮毒毫不可犯無書不載乃近人反令病者專服毒物以爲以毒攻毒夫解毒尙恐無

效豈可反增其毒種種謬誤不可殫述間有患外證之人若用安穩治法全不以爲妙用毒藥刀鏢者血肉淋漓痛死復活反以爲手段高強佩服深摯而偏處薦引因知疾痛生死皆有定數非人所能自主而醫者與病人以苦楚亦病者有以召之也

治法

凡病祇服煎藥而愈者惟外感之證爲然其餘諸證則必用丸散膏丹針灸砭鏢浸洗熨場蒸提按摩等法因病施治乃今之醫者既乏資本又惜工夫古方不考手法無傳寫一通治煎方其技已畢而病家不辭遠涉不惜重聘亦祇求得一煎方已大滿其願古昔聖人窮思極想製造治病諸法全不一問如此而欲愈大證痼疾無是理也所以今人患輕淺之病猶有服煎藥而愈者若久病大證不過遷延歲月必無愈理也故爲醫者必廣求治法以應病者之求至常用之藥一時不能卽合者亦當豫爲修製以待急用所謂工欲善其事必先利其器奈何欲施救人之術而全無救人之具也

劑劑

古時權量甚輕古一兩今二錢零古一升今二合古一劑今之三服又古之醫者皆自採鮮藥如生地半夏之類其重比乾者數倍故古方雖重其實無過今之一兩左右者惟千金外臺間有重劑此乃治強實大症亦不輕用也若宋元以來每總製一劑方下必註云每服或三錢或五錢亦無過一兩外者此煎劑之法也未藥則用一錢七丸藥則如桐子大者十九丸加至二三十丸試將古方細細考之有如今日二三兩至七八兩之煎劑乎皆由醫者不明古制以爲權量與今無異又自疑爲太重爲之說曰今人氣薄當略爲減輕不知已重於古方數倍矣所以藥價日貴而受害愈速也又有方中熟地用三四兩餘藥只用一二錢者亦從無此輕重懸殊之法要知藥氣入胃不過借此調和氣血非藥入口卽變爲氣血所以不在多也又有病人粒米不入反用膩隔酸苦腥臭之藥大碗濃煎灌之卽使中病尙難運化况與病相反之藥填塞胃中卽不藥死亦必灌死小兒

尤甚又不論人之貧富人參總爲不祧之品人情無不貪生必竭蹶措處孰知反以此而喪身其貧者送終無具妻子飄零是殺其身而并破其家也吾少時見前輩老醫必審貧富而後用藥尤見居心長厚況是時參價猶賤於今日二十倍尙如此謹慎卽此等存心今人已不逮昔人遠矣

煎藥服藥法

煎藥之法各殊有先煎主藥一味後入餘藥者有先煎衆味後煎一味者有用一味煎湯以煎藥者有先分煎後併煎者有宜多煎者補藥皆然有宜少煎者散藥皆然有宜水多者有宜水少者有不煎而泡漬者有煎而露一宿者有宜用猛火者有宜用緩火者各有妙義不可移易今則不論何藥惟知猛火多煎將芳香之氣散盡僅存濃厚之質如煎燒酒者將糟久煮則酒氣全無矣豈能和鬱達衛乎須將古人所定煎法細細推究而各當其宜則取效尤捷其服藥亦有益古方一劑必分三服一日服三次并有日服三次夜服三次者蓋藥味入口卽行於經絡驅邪養正性過卽已豈容間斷今人則每日服一次病久藥暫此一暴十寒之道也又有寒熱不得其宜早暮不合其時或與飲食相雜或服藥時卽勞動冒風不惟無益反能有害至於傷寒及外證痘證病勢一日屢變今早用一劑明晚更用一劑中間隔兩晝一夜經絡已傳病勢益增矣又發散之劑必煖覆令汗出使邪從汗散若不使出汗則外邪豈能內消此皆淺易之理醫家病家皆所宜知也又惡毒之藥不宜輕用昔神農遍嘗諸藥而成本草故能深知其性今之醫者於不常用之藥亦宜細辨其氣味方不至於誤用若耳聞有此藥並未一嘗又不細審古人用法而輒以大劑灌之病者服之苦楚萬狀并有因而死者而已亦茫然不知其何故若能每味親嘗斷不敢冒昧試人矣此亦不可不知也

延醫

疾病爲生死相關一或有誤追悔無及故延醫治病乃以性命相託也何可不加意慎擇如無的確可信之人寧可不服藥以待命乃世人獨忽於此惟以耳爲目不考其實學何如治效何若問人稱說卽延請施治服藥

無效毫不轉念甚而日重一日惟咎己病之難痊不咎醫者之貽誤孰知藥果中病即不能速愈必無不見效之理不但服後奏功當服時已有可徵者如熱病服涼藥寒病服熱藥之類聞其氣已馨香可愛入於口即和順安適如不中病之藥則聞其氣必厭惡入於腸必懷憤內經云臨病人問所便此真訣也今人則信任一人即至死不悔其故莫解想必冥冥之中有定數也又有與此相反者偶聽人言即求一試藥未盡劑又易一醫或一日而請數人各自立說茫無主張此時即有高明之人豈能違眾力爭以遭謗忌亦惟隨人唯諾而已要知病之傳變各有定期方之更換各有次第藥石亂投終歸不治二者事異而害同惟能不務虛名專求實效審察精詳見幾明決庶幾不以性命爲兒戲矣

秘方

古聖設立方藥專以治病凡中病而效者即爲秘方並無別有奇藥也若無病而服藥久則必有偏勝之害或有氣血衰弱藉藥滋補亦必擇和平純粹之品審體氣之所偏而稍爲資助如世所爲秘方奇術大熱大補之劑乃昔人所造以欺人者若其方偶與其人相合或有小效終歸大害其不相合者無不傷生更有一等怪方乃富貴人賄醫所造者余曾遇一貴公子向余求長生方余應之曰公試覓一長生之人示我我乃能造長生之方若長生者無一人則天下無長生之方矣其人有慍色是時適有老醫在其家因復向老醫求得之乃傲余曰長生方某先生已與我矣公何獨吝也余視其方乃聚天下血肉溫補之藥故難其製法使耳目一新者余私謂老醫曰先生之長生方從何傳授老醫曰子無見晒子非入世行道之人耳凡富貴之人何求不得惟懼不能長生縱慾耳故每遇名醫必求此方若長生方不知何以得行其道我非有意欺彼其如欲應酬於世自不得不然耳後果得厚酬余因知天下所傳秘方皆此類也此即文成五利之餘術萬勿以爲真可長生也速死則有之耳識此以醒世之求長生而覓秘方者

醫藥爲人命所關較他事尤宜敬慎今乃炫奇立異竟視爲元戲矣其創始之人不過欲駭愚人之耳目繼而互相效尤竟以爲行道之捷徑而病家則以爲名醫異人之術在此將古人精思妙法反全然不考其弊何所底止今略舉數端於左

人中黃 腸胃毒偶有用入丸散者今入煎藥是以黃汁灌人而創其胃矣 人中白 飛淨入末藥者煎服 鹿茸 傳入丸藥外遺虛偶入煎藥又古方以治血寒久痢今人以治熱毒時病等屬而死 河車膠

補腎丸藥偶用今入煎劑腥穢不堪又蚌水今人用一統半統以治小兒死者八九 蛇蛻 證用一二條酒沖已屬不典今蜈蚣蟻蟻帶必用數條肆中以羊腸蠶腸代之 白蟻 殼此收滿修藥亦入煎劑其味何在 雞子黃 此少陰不藥引經 燕窠

即桑 子胡蚌背極毒之物用者多 石決明 眼科磨光藥水煮入末藥今一切煎劑何義 醋炒半夏 醋煨赭石麻油炒半夏皆能傷

海參淡菜鹿筋丑筋魚肚鹿尾 皆食品不入藥煎必須洗淨加以薑椒葱酒醋炒半夏醋煨赭石麻油炒半夏皆能傷

而死 橋白樺內筋荷葉邊枇杷核查核扁豆殼皆方書所棄今備取之以示異 更有宜妙者反用生宜切者反用圓固此類不可枚

舉以上各種其性之和平者服之雖無大害亦有小損至諸不常用及阻毒之物病家皆不能炮製必至臭穢

惡劣試使立方之人取而自嘗之亦必伸舌攢眉嘔吐噦逆入腹之後必至脹痛腎亂求死不得然後深悔從

前服我藥之人不知如何能耐此苦楚恨嘗之不早枉令人受此荼毒也抑思人之求治不過欲全其命耳若

以從未經驗之方任意試之服後又不考其人之生死而屢用之則終身無改悔之日矣嗟乎死者已矣孰知

其父母妻子之悲號慘戚有令人不忍見者乎念及此能不讀書考古以求萬穩萬全之法者非人情也以上

所指皆近時之弊若後世此風漸改必不信世間有如此醫法反以我言爲太過者豈知並無一語虛妄者乎

又疑疑我爲專用寒涼攻伐者不知此乃爲誤用溫補者戒非謂溫補概不可用也願世之爲醫者真誠敬慎

勿用非法之方世之求治者明察知幾勿服怪誕之藥則兩得之矣

宗傳

一切道術必有本源未有目不睹漢唐以前之書徒記時尙之藥數種而可爲醫者今將學醫必讀之書并讀法開列於左果能專心體察則胸有定見然後將後世之書徧觀博覽自能辨其是非取其長而去其短矣

靈樞經 此明經絡藏府之所以生成疾病之所由侵犯鍼灸家不可不詳考方脈家略明大義可也

素問 此明受病之源及治病之法千變萬化無能出其範圍如不能全讀擇其精要切實者熟記可也

傷寒論 此一切外感之總訣非獨治傷寒也明於此則六淫之病無不通貫矣

金匱 此一切雜病之祖方其諸大證已無不備能通其理天下無難治之病矣

神農本草 神農本草經止三百六十種自陶宏景以後藥味日增用法益廣至明李時珍網目而大備其其

以本經爲主而以諸家之說附之讀者字字考驗則能知古人製方之妙義而用之不窮矣

外臺秘要

千金方 二書匯集唐以前之經方秘方及婦科兒科外科無所不備博大深微必明乎靈素仲景之書方能

知所審擇不至泛濫而無所適從矣

婦科

兒科 婦人除經帶胎產之外與男子同小兒除驚癇痧痘而外與老壯同所以古人並無專科後人不能通

貫醫理只習經產驚痘等方藥乃有專科若讀前所列之書則已無所不能更取後世所著婦人良方幼

幼新書等參觀可也

外科 其方亦具千金外臺後世方愈多而法愈備如蠶氏全書瘍科選粹俱可採取惡毒之藥及輕用刀鍼

斷宜切戒

御纂醫宗金鑑 源本靈素推崇傷寒論金匱要略以爲宗旨後乃博採衆論嚴其去取不尙新奇全無偏執

又無科不備真能闡明聖學垂訓後之足徵

聖朝仁民之術無所不周習醫者卽不能全讀古書祇研究此書足以名世何乃不此崇信而反從事於近世

杜撰無稽之說也